

## Beibel ta Palabra di Dios

Un anochi, ami ku mi esposa a keda na un hotèl na estado di New York. Na Merka, e organisashon kristian, Gideon, ta hasi esfuerso pa pone un Beibel den kada kamber di hotèl. Ma tin gerente di hotèl ku ta oponé kontra esaki. Mi tabata kontentu pa deskubrí un Beibel den kashi i m'a habrié. Riba e promé página, un hende a skirbi, “Esaki ta un buki fiktisio.” Mas despues, e persona a skirbi tokante “mentiranan” den Beibel. Den 1 òf 2 Krónikanan el a skirbi algu tokante apòstel Pablo.

Mientras mi a skrap e palabranan, mi a puntra mi mes kiko por a sosodé den bida di e persona ei ku a produsí tantu odio kontra un Buki ku opviamente e no tabata konosé bon.

Den bida, nos ta topa hende ku ta ridiculisá Skritura i ta rechasá ku Beibel ta Palabra di Dios. Nan por ta hopi agresivo i kategórico den nan deklarashonnan kontra e Buki divino. E tendencia natural ta pa kobardiá i hala atras. Ma no tin motibu pa kristiannan kobardiá, pasobra tin tantisimo evidensia ku Dios ta Outor di Skritura. Den nos estudio, nos ke pensa tokante e evidensia aki.

Promé ku nos ta kuminsá mira diferente argumento, ta bon pa nos duna un surgerensia. Algun argumento (sigur e promé evidensianan) ta basá riba e teksto di Skritura mes. Talbes e argumentonan aki lo ta un yudansa pa un kristian ku tin duda si Beibel ta Palabra di Dios. Ma si bo ta kombersá ku un ateo òf un persona ku ta rechasá ku Dios ta Outor di Skritura, ta mas prudente pa kuminsá ku e último argumentonan, pasobra e evidensia ei ta basá riba faktonan i echunan ophetivo. E argumentonan ei ta komprobá dor di historia i ekspertonan ku sigur no tabata subhetivo.

Den e estudio aki, nos lo nota 19 argumento ku Beibel ta Palabra di Dios. Ora bo ta kompartí pruebanan ku un persona ku Beibel ta un Buki divino, ta importante pa bo sa adelantá kiko su pensamentu ta. E ora ei, bo por kuminsá ku e argumentonan ku por yud'é mas tantu.

Kòrdando esei, nos ke kuminsá mira e evidensianan. Studiando e pruebanan aki talbes lo enkurashá bo mes konfiansa den Skritura i na mésun tempu proveé argumentonan ku bo por kompartí ku esnan ku ta oponé òf ku tin duda.

### I. TESTIMONIO DI BEIBEL

Splikashon: Un evidensia ku Beibel ta Palabra di Dios ta Skritura mes ta bisa ku e ta un Buki divino.

Pa hopi hende, e argumento aki no ta parse lógiko i konvensiente. Beibel ta Palabra di Dios. Kon bo sa esei? Pasobra Beibel mes ta bisa ku e ta Palabra di Dios. Wèl, djis pasobra Skritura ta *bisa* ku Dios ta su Outor, no ta garantisá ku Beibel Palabra di Dios. Otronan tambe ta afirmá ku nos mester aseptá ku Dios ta Outor di nan buki: Buki di Mormon, Koran, èts. Djis pasobra Beibel ta *deklará* ku Dios ta su Outor no ta *sigurá* ku e ta Palabra di Dios.

Si esaki tabata e úniko evidensia ku Dios ta Outor di Skritura, nos lo no tin un fundeshi sólido. Ta importante pa nos no isolá e argumento aki for di tur otro evidensia.

Ma tòg, nos ta kuminsá ku e argumento aki. Pakiko? Pasobra lógikamente no tin mihó lugá pa kuminsá ku testimonio di e akusado. Den korte, hues ke tende e akusashon i tambe e

defensa di e akusado. E pregunta ku nos ta konsiderá aki ta, “Beibel ta Palabra di Dios?” Kiko e akusado mes ta bisa? Skritura ta afirmá ku e ta Dios Su palabranan si òf nò? Ademas, legalmente e akusado mester tin chèns pa defendé su mes. Pues, ta importante pa skucha testimonio di Skritura mes. Kiko Beibel ta bisa tokante su mes?

### A. TÈSTAMÈNT BIEU TA AFIRMÁ SU ORIGEN DIVINO MAS ÒF MÉNOS 3.800 BIAHA

Tèstament Bieu ripitidamente ta deklará: “*Asina Señor ta bisa*”, “*Señor a bisa*”, “*palabra di Señor a yega na...*” Por haña e palabranan aki mas ku 3.800 biaha. Ta mas kla ku di dia ku Skritura ta deklará ku e ta nada ménos ku “Palabra di Dios”.

### B. BEIBEL TA ENFATISÁ KU SKRITURA TA INSPIRÁ

Dos Timoteo 3:16 no ta laga duda ku e palabranan di Skritura ta Dios Su palabranan: “*Tur Skritura ta inspirá pa Dios...*” Tambe 2 Pedro 1:21 ta bisa, “*...nunka profesia no a wòrdu duná pa medio di e boluntat di hende, ma hòmbènan santu di Dios a papia, inspirá dor di Spiritu Santu.*” E palabra “*inspirá*” ta un palabra griegu ku ta nifiká “*rosea di Dios*”. Den otro palabra, e palabranan di Skritura ta e palabranan ku Dios a papia.

### C. KOMPARANDO TEKSTONAN DI TÈSTAMÈNT BIEU KU TÈSTAMÈNT NOBO TA INDIKÁ KU BEIBEL TA PALABRA DI DIOS

Paga bon tino ken ta papia den e siguiente tekstonan. Na man robes, un teksto di Tèstament Bieu ta mensioná. Na man drechi, Tèstament Nobo ta sita e mésun teksto di Tèstament Bieu. Den Tèstament Bieu, nos ta haña impreshon ku tabata solamente e eksritor humano ku tabata skirbi. Ma e teksto den Tèstament Nobo ta bisa bon kla ku Dios òf Spiritu Santu tabata Esun ku a papia.

Ken a papia den Tèstament Bieu?		Ken Tèstament Nobo a bisa a papia?	
E salmista	Salmo 95:7-8	Spiritu Santu	Hebreonan 3:7-8
E salmista	Salmo 45:6	Dios	Hebreonan 1:8
E salmista	Salmo 102:25-27	Dios	Hebreonan 1:10-12
Isaias	Isaias 7:14	Señor pa medio di Isaias	Mateo 1:22
Oseas	Oseas 11:1	Señor pa medio di Oseas	Mateo 2:15
Outor di Génesis	Génesis 2:24	Dios	Mateo 19:3-6

Kiko e “akusado” ta bisa tokante su mes? Nos por bisa ku literalmente Skritura ta testifiká miles di biaha ku e ta Palabra di Dios!

## II. TESTIMONIO DI HESUS

Splikashon: Un otro evidensia ku Beibel ta Palabra di Dios ta pasobra Hesus a kere ku Beibel ta Palabra di Dios!

Atrobe, den bista di hopi hende e argumento aki no tin peso. Nan lo argumentá ku naturalmente Hesus lo bisa ku Skritura ta Palabra di Dios pasobra E ta kere esei òf pasobra E ke pa e ta Palabra di Dios...pues, Su testimonio no ta konfiabel. I atrobe, nos por aseptá ku talbes e argumento aki tin sierto balides si no tabatin otro evidensia.

Laga nos mira kiko tabata Hesus Su opinion di Skritura. Ripitidamente Hesus a sita Tèstament Bieu komo outoridat divino i final:

- ✓ Hesus a aseptá e echu ku Yonas tabata den barika di e piská grandi pa tres dia i tres anochi—méskos ku lo sosodé kun’E: Mateo 12:40 – “*...meskos ku Jonas tabata tres dia i tres anochi den barika di e monster di laman, asina e Yu di Hende lo ta tres dia i tres anochi den kurason di tera.*”
- ✓ Den Mateo 22:31-32, Hesus a basa Su argumento pa bida despues di morto riba un solo verbo den Eksodo 3:8: “*...boso no a lesa loke Dios a papia ku boso, bisando:*

*‘Ami ta e Dios di Abraham, i e Dios di Isaak, i e Dios di Jakòb’? E no ta e Dios di e mortonan, sino di e bibunan.’*

- ✓ Hesus a konfundí e hudiunan dor di usa Skritura. Klaramente tantu Hesus komo e hudiunan a konsiderá ku Skritura ta Palabra di Dios: Mateo 22:43-45 – *“El a puntranan: ‘Di kon anto, den Spiritu, David a yam’E ‘Señor’, bisando: ‘Señor a bisa mi Senor: ‘sinta na Mi man drechi, te ora Mi pone Bo enemigunan bou di Bo pianan’”’?”*
- ✓ Hesus a aseptá e relato bíbliko di e diluvio komo un fakto históriko. Mateo 24:38 – *“Pasobra meskos ku den e dianan ei ku tabata promé ku e diluvio, nan tabata kome i bebe, nan tabaqa kasa i duna pa kasa, te dia ku Noe a bai den e arka...”*
- ✓ Otro teksto ku nos por mira ku ta demonstrá ku Hesus a konfia Skritura komo un Buki divino: Marko 10:1-6; 13:31; Lukas 16:17; 17:32; Juan 5:46-47; 10:35; èts. Hesus a konsiderá Skritura outoridat final. Si Beibel a bisa, no tin mas kos di papia!

Tambe, klaramente Hesus tabata konvensé ku Skritura ta permanente i muchu mas ku un buki humano. E Buki Divino lo keda na vigor síglonan despues ku e persona no t’ei mas. Esei por ta bèrdat solamente si Beibel ta mas ku un buki humano. Loke Skritura ta bisa, lo wòrdu kumplí: *“No kere ku Mi a bin pa aboli e Lei òf e Profetanan: Mi no a bin pa aboli, sino pa kumpli. Pasobra di bèrdat Mi ta bisa boso, te ora ku sheku i tera pasa, ningun yota ni tilde di e Lei lo no pasa, te ora ku tur kos keda kumpli”* (Mateo 5:17-18).

E “yota” ta e tradukshon griegu (IOTA) di e lèter hebreo mas chikitu (YOD). Por mira kon chikitu e lèter ei ta nèt promé ku Salmo 119:73 den Beibel Santu. E “tilde” ta un pida chikitu di un solo lèter. Por ehèmpel, kompará e diferencia entre dos lèter hebreo. Nèt promé ku Salmo 119:33 por mira e lèter hebreo, HE. I nèt promé ku Salmo 119:57 tin e lèter hebreo HET. Ripará ku e diferencia entre e dos lèternan ei ta solamente e parti habri na HE. Esei ta e “tilde”.

Hesus a afirmá tokante Skritura ku kada palabra, kada lèter, asta kada pida di lèter ta permanente, inspirá pa Dios. Hesus no tabatin duda ku tur Skritura ta Palabra di Dios!

Promé ku nos ta pasa pa e siguiente argumento, ta bon pa nos pensa esaki for di un otro ángulo. Tin hende ku lo afirmá ku Hesus a eksistí, ma ku E tabata nada mas ku un gran instruktur. Laga nos para ketu i evaluá e deklarashon ei. Un gran instruktur lo sita un buki fiktisio? Un gran instruktur lo basa su argumentonan riba un buki ku ta deklará ku e ta algu ku e no ta? Un gran instruktur lo usa un buki di fábula pa hasi deklarashon outoritario? Lo ta meskos si Hesus a bisa, “Mi ta deklará e bèrdat outoritario aki ku Mi a mira na ‘cartoon’”. Òf, “Mi ta afirmá i siguiente lei ku Kompa Nanzi a deklará.”

Un “gran instuktur” ku ta bisa algu ridíkulo asina, no ta un “gran instruktur”! Òf Hesus tabata un gran Instruktur i Beibel ta Palabra di Dios òf Hesus no tabata un gran instruktur i Skritura no ta Palabra di Dios. No ta pusíbel pa separá un afirmashon for di e otro.

### III. TESTIMONIO DI KRISTIANNAN

Splikashon: Di tres evidensia ku Beibel ta Palabra di Dios ta e echu ku kristiannan ta kere ku Beibel ta Palabra di Dios.

Esaki tambe ta un argumento ku algun hende lo rechasá. Nan lo bisa, “Ta lógiko ku kristiannan lo bisa ku Beibel ta un Buki divino pasobra esei ta loke nan ke kere.” Ora un hende ta presentá dilanti mesa bèrdè, hues por tene na kuenta loke amigunan di e akusado ta bisa. Normal, testimonio di amigunan no ta determiná si hues ta yega na konklushon ku e akusado ta kulpabel òf inosente. Ma di otro banda, si testimonio di tur e akusado su amigunan ta ku e ta kulpabel òf tur ta afirmá ku e ta inosente, e testimonionan ei tin sierto peso!

Manera nos a bisa kaba, si un persona ta rechasá Beibel komo Palabra di Dios, nos lo no kuminsá ku e argumentonan aki. Pero, ora bo ta kòrda e otro evidensianan, e argumento aki tambe ta na su lugá.

Sin embargo ta un echu ku Spiritu Santu ta duna kreyentenan siguransa den nan mes spiritu ku Dios ta Outor di Skritura. Esaki ta algu suphetivo—ma e tòg ta un argumento bálido. Beibel ta indiká ku e persona ku ta kamna ku Señor dia tras dia ta rekonosé Su stèm. Juan 10:4-

5,27 ta bisa, “...e karnénan ta siguié, pasobra nan konosé su bos. I un hende straño sigur nan lo no sigui, ma lo hui bai for di djé, pasobra nan no konosé bos di hende straño. Mi karnénan ta tende Mi bos, i Mi konosé nan, i nan ta siguiMi.” E kreyente ta lesa Skritura i ta tende bos di e Bon Wardadó.

Segun Juan 7:17, “Si un hende kier hasi Su boluntad, e lo sa di e siñansa, si ta di Dios e ta, òf si ta Mi mes ta papia”. Hende ku ta hasi loke Dios ta bisa, lo tin e siguransa den nan ser ku Dios ta Outor di Beibel. Tambe 1 Korintionan 2:14 ta laga sa dikon hende ku no konosé Kristu komo Salbador personal no ta komprendé kosnan spiritual. “Ma un hende ku no ta spiritual no ta aseptá e kosnan di e Spiritu di Dios; pasobra nan ta lokura p’è, i e no por komprendé nan pasobra ta spiritualmente na ta wòrdu huzgá.” Solamente un hende ku ta biba segun Spiritu Santu por komprendé.

Esaki por ta konsiderá algu suphetivo. Nos no por splika kon nos sa ku Beibel ta Palabra di Dios. Ma Spiritu Santu ta duna testimonio huntu ku nos spiritu! Nos tin e siguransa aki den nos kurason!

#### IV. KOMPAREANDO BIDA DI ESNAN KU TA ASEPTÁ ÒF RECHASÁ BEIBEL

Splikashon: E diferensia ku Beibel ta hasi den bida di hende ta un evidensia ku Beibel ta Palabra di Dios.

Algun hende ta bisa ku Beibel no ta hasi diferensia den bida di hende. Esei ta bèrdad? Imaginá ku un anochi lat bo ta kamna bo so den un bario konosí pa krímen. Seis hòmbler griso ta bin den bo direkshon. Kon bo ta sinti? Kasi sigur bo ta sinti miedu. Ma so poné ku bo sa ku e seis hòmbrenan ei ku ta bin den bo direkshon ta bandonando e sitio kaminda nan tabata studia Beibel huntu. Esei lo kambia bo emoshon? Sigur ku si!

Bida di esnan ku ta aseptá ku Beibel ta un Buki divino—i tambe bida di esnan ku ta rechasá Skritura komo un Buki divino—ta duna testimonio di e echu ku Dios ta Outor di Beibel.

*En general*, hende ku ta desente, moral, bon trahadó, generoso, bon siudadano, no ta buska nan propio interes, èts. ta hende ku ta kere Beibel. Talbes nan no ta hende ku a konfia den Hesu-Kristu pa salbashon. Ma nan tin temor pa Dios. Di otro banda, *en general*, hende ku no ta desente, ta immoral, floho, eogísta, pichiri, ta viola lei, no ta komportá nan, èts. ta hende ku no ta kere Beibel. Klaramente tin eksepsion den tur dos kaso. Ma esaki ta un realidat general.

*En general*, hende ku bèrdaderamente i sinseramente ta kere ku Skritura ta un Buki divino no tin mester di polis. Nan ta ehersé dominio propio i no ta sigui nan deseonan malu. *En general*, hende ku ta nenga Beibel komo Palabra di Dios, tin mester di polis pa obligá nan pa obedesé lei. 1 Timoteo 1:8-10 ta komprobá esei: “Ma nos sa ku e Lei ta bon, si un hende uz’è legalmente, siendo konsiente di e echo ku lei no ta trahá pa hende hustu, ma pa esnan ku ta sin lei i ku ta rebelde, pa e impionan i pekadónan, pa esnan impuru i profano, pa esnan ku ta mata nan tata i mama, pa matadónan i fornikadónan, homoseksualnan, sekuestradónan, gañadónan, huradónan falsu, i kualkier otro kos ku ta kontrario na siñansa sano...”

Durante tempu di revivamentu na Wales na Gran Britania, Dios a transformá bida di tantu hende ku huesnan no tabatin kasonan mas. Polis no tabatin nada di hasi. Nan a forma un grupo ku ta biaha i kanta na diferente iglesia.

En kontraste di e ehèmpel positivo ei ta e ateo famoso, Madalyn Murray O’Hair (1919-1995). E muhé merikano tabata miembro di partidonan sosialista i komunista i a purba bira habitante di Union Sovietiko. O’Hair ta mihó konosí pasobra el trese un kaso dilanti pa su yu, William, no mester haña instrukshon for di Beibel na skol—loke tabata normal na Merka e tempu ei. Komo resultado, Beibel tabata prohibí i orashon na skolnan na Merka. Sinembargu, e yu, William, a bira kristian i a skirbi un buki tokante su bida komo yu di su mama famoso. El a konsiderá Madalyn Murray O’Hair un mal hende.

Si bo ta kere ku Dios ta eksistí i ku Beibel ta Palabra di Dios, esei lo afektá manera bo ta biba. Ma di otro banda, si bo ta rechasá Beibel komo un Buki divino ku outoridat divino, anto bo por skohe pa hasi loke bo ke, pasobra no tin norma, balor òf moralidat universal mas. Aldous Huxley tabata un ateo ku a purba destruí fe di kristiannan ku su rasonamentu. El a skirbi ku su

“filosofia ku bida-ta-sin-proposito tabata un hèrmènt pa libertat seksual i polítiko.” Huxley tabata sa ku e kerensia ku Beibel ta Palabra di Dios lo afektá e manera ku hende ta biba. P’esei e tabata ke destruí e kerensia ei.

En general, bida di hende ku ta aseptá Skritura komo un Buki divino ta distinto for di bida di esun ku ta rechasá esei. E echu ei ta mustra dede den direkshon ku Beibel ta Palabra di Dios.

## V. KRESEMENTU DEN SANTIDAT TA GUIA DEN DIREKSHON DI BEIBEL

Splikashon: Di sinku argumento ku Beibel ta Palabra di Dios ta e echu ku mas bo ta krese den santidat, mas bo ta konvensé ku Beibel ta Palabra di Dios.

Imaginá ku bo ta den selva—abo so ku un guia. Boso ta sigui un kaminda smal i ta yega na un lugá ku bo tin ku skohe entre dos kaminda ku ta bai den dos diferente direkshon. Bo guia ta bisábo pa bai na man robes, ma bo ta skohe pa bai na man drechi. Despues di tempu bo ta realisá ku bo a bai kaminda robes i bo ta regresá bèk i ta bai direkshon ku bo guia a indiká. Poko despues, atrobe boso ta enkontrá un situashon similar. Bo guia ta bisa pa bai na man drechi e biaha aki. Ma bo ta opta pa bai na man robes. Atrobe, despues di tempu bo ta komprendé ku esei no ta e kaminda korekto i bo ta regresá na bo guia. Esaki ta sosodé rípitidamente. Kada biaha bo ta ignorá konseho di bo guia, bo ta bin ripará ku abo ta esun ku a kiboká—no e guia. Porfin bo ta konkluí, mihó mi sigui konseho di mi guia na lugá di bai mi mes kaminda.

Ora bo a kuminsá e bida kristian, talbes un persona a bisábo ku bo mester sigui instrukshon di Skritura si bo ta deseá eksito den bo bida. Tin ora bo ta obedesé. Ma tin ora bo ta ignorá loke Beibel ta bisa. Bo ta kuminsá nota ku kada biaha bo ta rebeldiá kontra Palabra di Dios ku bo ta hañábo den choka mata. Bo ta ripará ku Skritura tin rason—i ku abo ta esun ku ta kiboká.

Mas bo ta krese den santidat, mas bo ta konvensé ku Beibel ta outoridat final—ku Dios ta Outor di Skritura. E Buki divino ta korekto i santu i ta guiábo den kaminda di santidat. Segun Salmo 119:140, “*Bo palabra ta puru, pesei Bo sirbidó ta stim’é.*” Salmo 119:9,11 ta hasi pregunta, “*Kon un hoben por tene su kaminda puru?*” E teksto ta kontestá: “*Dor di mantené esei segun Bo palabra...Bo palabra mi a skonde den mi kurason, pa mi no peka kontra Bo.*” Dos Timoteo 3:16-17 ta indiká propositonan di Beibel: “*Tur Skritura ta inspirá pa Dios i ta útil pa siñansa, pa reprimimentu, pa korekshon, pa eduká den hustisia, pa e hende di Dios por ta perfekto, ekipá pa tur bon obra.*” Beibel ta bisa nos kon pa biba (“*siñansa*”), unda nos a desviá (“*reprimimentu*”), kon nos mester regresá (“*korekshon*”), i kon nos por sigui hiba un bida santu (“*eduká den hustisia*”).

Un persona a regalá un Beibel na un hóben. El a skirbi riba e promé página, “E Buki aki lo kitábo for di piká, òf piká lo kitábo di e Buki aki.” Esei ta bon bisá! Nos sa ku Beibel ta un Buki divino pasobra e ta guia nos den kaminda di santidat.

## VI. PODER DI BEIBEL PA TRANSFORMÁ BIDANAN

Splikashon: Beibel ta Palabra di Dios ta pasobra Dios ta usa Beibel pa kambia bida di hende.

Beibel ta e úniko buki ku por hasi milager den bida di hende—pasobra Beibel ta skirbí pa un Outor todopoderoso. Beibel ta transformá bidanan. E ta hasi un asesino òf terorista bira un hende di stimashon. E hende immoral, e prostituta, e homoseksual ta kambia bira hende moral. Skritura ta transforma e ladron, hasié un hende onesto i generoso. E gañadó ta kambia pa un hende ku ta papia bèrdad. E kobarde ta haña kurashi. E Buki divino ta transformá e drogadikto i e buraché for di esklabitat pa bira un persona liber. Enemigunan ta stima otro pa kousa di Beibel. Tin tantísimo evidensia tur rònt di nos di hende ku Dios a transformá pa medio di Su Palabra. Skritura ta ofresé pordon di piká, amor pa otronan, santidat, pas, bondat, alegria, bida etèrno, i muchu mas!

Kua otro buki por hasi esei? Bo a yega di tende un hende duna testimonio kon su bida tabata sin speranza, sin pas, yen di piká i problema. Ma awor e tin trankilidat i alegria den su kurason i speranza pa etèrnidat...pasobra el a lesa un buki tokante lei, filosofia, religion?

Kua otro buki ta ofresé pordon di piká i pas ku Dios? Un buki di Karl Marx, Koran, Buki di Mormon, buki di L. Ron Hubbard? Ningun buki por hasi esei!

Influensia di Beibel ta sin límite. Su influensia ta universal—no ún nashon so! Skritura ta krusa bareranan kultural—e no ta limitá na un kultura so! Palabra di Dios ta papia hopi idioma—no un lenga so! E Buki Santu ta alkansá diferente nivel intelektual—esnan ku ta sumamente sabí i e persona ku no tin edukashon. Beibel ta surpasá tur barera i ta influensia ur koló, rasa i género!

Unda ku Beibel ta bai, bon resultado ta sigui: skol, hospital, klínika médiko, kuido pa ansianonan i hende oprimí, sentro pa adikshon, libertat pa esklabunan den negoshi di sèks, hustisia, programanan pa lesa-skirbi, awa limpi, èts.

Hinduísmo no ta interesá pa yuda nan pobernan. Nan ta kere ku esei ta nan karma. E pobernan mester sufri den e mundu aki pa nan por tin mihó bida ora nan wòrdu inkarná den e siguiente bida. Hinduísmo no ta mata djakanan ku ta destruí nan kuminda i ta kousa enfermedat pasobra e djakanan por ta un di nan antepasadonan ku ta eksperensia nan karma komo djaka.

Mòslemnan no ta stima nan próhimo. Alkontrario, nan ta siña jihad. Segun Koran, mester mata esnan ku ta bandoná Islam i oprimí òf mata esnan ku no ta mòslem. Teroristanan mòslem simpelmente ta sigui e siñansa di Koran.

Beibel—Beibel so—por hasi milager den bida di hende. *“E lei di SEÑOR ta perfekto, e ta restorá alma; e testimonio di SEÑOR ta fiel, e ta hasi hende simpel bira sabí. E preseptonan di SEÑOR ta korekto, nan ta alegrá kurason; e mandamentunan di SEÑOR ta puru, nan ta iluminá wowo”* (Salmo 19:7-8). Beibel—Beibel so—por transformá bidanan, pasobra Beibel ta Palabra di Dios

## VII. BEIBEL NUNKA TA BIRA UN BUKI LAF

Splikashon: Maske bo ta lesa Skritura diferente biaha, kada bes e ta bira mas interesante, demonstrando ku e ta Palabra di Dios.

Kuantu buki bo a yega di lesa dos biaha? Tin buki ku bo a lesa tres biaha? Nos no ta lesa bukinan bes tras bes pasobra nos ta pèrdè interes. Ya kaba nos sa kontenido di e buki.

En kontraste, kuantu bes bo a yega di lesa Salmo 23, Isaias 40, Mateo 5:3-12 òf 1 Korintionan 13? Kada biaha bo ta lesa e teksto, e ta enkurashábo, konsolábo, òf bo ta ripará algu nobo. Pa bo, e ta mas interesante ku e tabata den pasado. Nunka bo por koba tur e tesoronan for di Skritura, maske kon hundu bo ta koba. George Muller a lesa Beibel mas ku shen biaha i kada biaha el a hañ’é mas intersante.

Bo konosé un otro buki asina? Kua otro buki hudiu ta interesante pa hende ku no ta hudiu? Kua otro buki ta interesante den kada kultura—tantu e sheik den desierto di Saudi Arabia komo e èskimo di Alaska. E ta aplikabel pa e multi-bionario den su kantor den un edifisio haltu na Singapor komo e salvahe sunú den selva di India. E Buki divino ta aseptá pa tur nivel mental—e neuro-sirugano i e mucha mentalmente retardá. E ta presioso pa kada rasa—korá, kuli, skur, kla. E ta stimá pa kada idioma—Walamo, Luganda, Zulu, Taki Tanki, Hausa, Spañó, Papiamentu. E ta mes interesante awe ku e tabata 2000 aña pasá. E ta stimá pa mucha, hóben, adulto, ansiano. Skritura ta aseptá komo un buki spesial pa reinan i katibunan, doño komo peon, sabi komo ignorante, santu komo pekadó, martir komo asesino. E ta lesá, studí i memorisá. E ta inspirá hopi literatura, poesia, músika, drama, arte. Beibel ta un Buki pidí den prizon, hospital, durante guera, na tempu di morto.

Palabra di Dios ta úniko i presioso! Salmo 119 ta enfatisá esaki den tantu versíkulo: *“...ami tin delisia den Bo lei”* (70), *“E lei di Bo boka ta mihó pa mi ku miles di pida oro i plata”* (72), *“Bo lei ta mi delisia”* (77), *“Mi wowonan ta faya di anhelo pa Bo palabra”* (82), *“O kuantu mi ta stima Bo lei”* (97), *“ki dushi Bo palabranan ta pa mi shel’i boka”* (103), *“...Bo testimonionan...ta e goso di mi kurason”* (111), èts.

No ta importá kuantu biaha bo a lesa i studia Skritura, Beibel nunca ta bira un buki laf, pasobra e ta Palabra di Dios

## VIII. BEIBEL SU SIÑANSA SUPERIOR

Splikashon: Un Buki ku su siñansa ta superior ku e siñansa di e hendenan mas inteligente, mester originá ku Dios.

Hende ta kompará e siñansa di Beibel ku e instrukshon di Zoroaster, Buddha, Confucius, Epictetus, Socrates, Marcus Aurelius, Plato, Mohammed, èts. Ma e siñansa di Beibel ta distinto den e siguinete maneranan:

### A. BEIBEL TA KONTENÉ NADA SINO BÈRDAT

Siñansa falsu tin mester tin sierto instrukshon bèrdat pa e por ta atraktivo. Otro literature ta kontené bèrdat...bèrdat mesklá huntu ku eror. Nan por proveé algun bèrdat i bon instrukshon. Ma bo mester buska e prendanan di bèrdat den e lodo di mentira.

Ora nos ta pensa tokante informashon no-religions, intenshon di mayoria instrukshon den literature no ta pa gaña. Na momentu ku e buki a wòrdu skirbí, e siñansa tabata konsiderá echu irefutabel, informashon aseptá en general pa ekspertonan ku tabata di akuerdo. Ma ku tempu, estudionan nobo, informashon nobo sa sosodé ku e skirbimentu di hende super-inteligente ta deskreditá i probá di ta kiboká!

E siñansa den Beibel ta konfiabel. E Buki divino no ta kiboká i no ta gaña. (Ta bèrdat ku tin relatonan di mentira den Beibel. Ma nan ta relatonan bèrdat di mentiranan.)

### B. BEIBEL TA KONTENÉ TUR BÈRDAT

Tur bèrdat moral òf spiritual por wòrdu hañá den Skritura, sikiera den un forma inisial. Òf tin prinsipionan ku bo por apliká pa trata ku diferente situashon moral òf spiritual ku bo ta enkontrá.

Kòrda tambe ku otro hende a hòrta òf kopia bèrdat for di Beibel i a presentá esaki komo nan mes bèrdat i siñansa.

### C. BEIBEL TA KONTENÉ MAS BÈRDAT KU TUR OTRO SIÑANSA KOMBINÁ

Imaginá ku bo por lesa tur literature humano (sea ta literatura antiguo òf modern) i sefta saka tur e partinan malu for di e bukinan i ta keda solamente ku e partinan bon. Si bo ta pone tur e partinan bon na un banda di un balansa i Beibel na otro banda di e balansa, Palabra di Dios tòg lo pisa muchu mas. Beibel ta kontené muchu mas bèrdat ku tur otro literature kombiná.

Kon esei por ta si Beibel no tabata Palabra di Dios? Den Su orashon den Juan 17:17, Hesus a bisa, “*Bo palabra ta bèrdat.*” E salmista a skirbi, “*...e huisianan di Señor ta bèrdadero...Bo lei ta bèrdat...Bo mandamentunan ta bèrdat...Bo palabra den Su totalidat ta bèrdat*” (Salmo 19:9b; 119:142,151,160).

## IX. BEIBEL SU SIÑANSA KONTRARIO DI SIÑANSA HUMANO

Splikashon: Si Skritura ta solamente un buki humano, su étika mas haltu i mas kulminante lo ta loke hende por imaginá. Ma e étika di Beibel ta muchu mas haltu ku e étika di hende. E ta un étika ku hende no por a inventá, demonstrando ku Beibel ta Palabra di Dios.

“*Pasobra Mi pensamentunan no ta boso pensamentunan, ni boso kamindanan no ta Mi kamindanan, Señor ta deklará. Pasobra meskos ku e shelunan ta mas haltu ku tera, asina Mi kamindanan ta mas haltu ku boso kamindanan, i i Mi pensamentunan mas haltu ku boso pensamentunan.*”

E Buki divino ta evidensia ku Dios Su pensamentunan ta muchu mas superior i asta kontrario di e pensamentunan mas inteligente di hende:

Pensamentu di Hende	Pensamentu di Dios	Teksto
Odia bo enemigunan	Stima bo enemigunan	Mateo 5:44

Hende ta mehorá (evolushon)	Hende ta degenerá (kreashon i kaída)	Génesis 1-3
Bringa pa biba Bringa pa haña Lucha pa ser eksaltá	Biba dor di muri Haña dor di pèrdè Baha pa subi—umiyá bo mes	Juan 12:24-25 Filipensenan 3:8 Mateo 23:11 Santiago 4:10
Eksaltá sabiduria di hende	Ridikulisá sabiduria di hende	1 Korintionan 1:18-19
Matamentu ta solamente e akto di kita bida di otro hende Inmoralidat ta solamente e akto di relashon seksual ku un person ku no ta bo kasá	Matamentu ta den kurason Inmoralidat ta den kurason	Mateo 5:21-30
Salbashon dor di propio esfuerso i obranan	Salbashon ta pa medio di gracia di Dios—dor di e morto di Hesus na nos lugá	Efesionan 2:8-9; 1 Korintionan 2:6-9

Nos ta ripití! Si Beibel tabata solamente un buki humano, e étika mas haltu lo ta di nivel humano. Ma e étika di e Buki divino ta surpasá e étika di hende.

Laga nos mira un ehèmpel di esaki. Hesus a introdusí e étika, “*meskos ku boso kier pa hende hasi ku boso, boso tambe hasi ku nan*” (Mateo 7:12; Lukas 6:31). Hudiunan a konosé un ekspreshon similar—ma distinto. Tobit 4:15 (den e bukinan deuterokanoniko di Tèstament Bieu) ta bisa, “I loke bo ta odia, no hasi esei na ningun hende.” Hesus Su deklarashon tabata muchu mas elevá.

E deklarashon negativo di e hudiunan ta esensial pa un komunidad sivilisá. Klaramente, si bo ta hasi na hende loke bo mes ta odia, bo lo hòrta di nan, mata nan, gaña nan, kometé aktonan immoral, èts. Sin e regla ei, bo lo mester ta agradisidu kada biaha ku bo ta topa un persona i e no ta matábo òf hasíbo daño. “I loke bo ta odia, no hasi esei na ningun hende” ta prohibí esei. Ma e regla aki solamente ta prohibíbo di hasi sierto kos! Di bèrdat, si bo nunca ta lamta di bo kama mainta, bo ta obedesé e regla aki—pasobra bo a hasi nada malu na otro hende. Ma esei no ta kristianismo!

Hesus Su forma di e regla tabata riba un nivel muchu mas elevá...un étika muchu mas haltu. “*Meskos ku boso kier pa hende hasi ku boso, boso tambe hasi ku nan*” ta prohibíbo di hasi sierto kos negativo i tambe ta prohibíbo di *no* hasi sierto kos. Hesus Su étika positivo no solamente ta bisábo pa no hasi daño na hende. E tambe ta instruíbo pa hasi bon na otronan.

Pa ilustrá esaki, pensa tokante e storia di e bon samaritano (Lukas 10:25-37). Den e storia aki, nos por nota tantu pensamentu humano komo divino. Filosofía di e ladronan tabata, “Loke ta di bo, ta di mi. Mi ta kohé.” Filosofía di e saserdote i levita tabata, “Loke ta di mi, ta di mi. Mi ta keda kun’è.” Filosofía di e bon samaritano tabata, “Loke ta di mi, ta di bo. Mi ta dun’è.”

E ladronnan a desobedesé e regla negativo—nan a hasi daño na e víktima. E saserdote i levita a obedesé e regla negativo—nan no a hasi daño na e persona. Ma solamente e bon samaritano a obedesé e regla positivo—el a yuda e víktima. E étika mas haltu ta loke Hesus a enkurashá.

Ta opvio ku e étika di Dios ta muchu mas haltu ku e normanan di hende. Beibel ta reflehá normanan di Dios ku ta muchu mas elevá, indikando ku Beibel ta Palabra di Dios.

## X. BEIBEL TA PAPIA KU OUTORIDAT DIVINO

Splikashon: Un otro evidensia ku Beibel ta Palabra di Dios ta e echu ku Beibel ta papia ku outoridat divino.

Klaramente e Dies Mandamentunan ta un ehèmpel di Dios papiando ku outoridat den Skritura: “*No mata. No kometé adulterio. No hòrta. No lamta testimonio falsu kontra bo próhimo.*” (Eksodo 20:12-16). Dios no a duna Dies Surgerensia. El a papia ku outoridat—lagando hende sa ku sierto kos ta bon i sierto kos ta malu. Nos por sita hopi otro ehèmpel ku leinan i mandamentunan kategórikiko ku Dios a duna.

Hende a keda strañá kon Hesus a papia. El a papia ku outoridat, en kontraste di e siñadónan hudiu. Nos ya kaba a menshoná ku Tèstament Bieu ta klaramente deklará su origen



divino dor ku e ta bisa mas ku 3.800 biaha, “*Asina Señor ta bisa*”, “*Señor a bisa*”, “*palabra di Señor a yega na...*”

Ma Hesus a papia otro. Hesus no a bisa, “*Asina Señor ta bisa*”. Alkontrario El a bisa, “*Ami ta bisa*”. Un bon ehèmpel di esaki ta haña den Su diskurso den Mateo 5:21-48. Rípidamente El a bisa, “*Boso a tende ku a wòrdu bisá na e hendenan di promé aya...Ma Ami ta bisa...*” El a papia ku outoridat divino.

Na final di Su diskurso, nos ta haña reakshon di e multitud: “*I a sosodé ku ora Hesus a kaba di papia e palabranan aki, e multitudnan a keda asombrá di Su siñansa; pasobra E tabata siña nan manera un hende ku tin outoridat, i no manera nan eskribanan*” (Mateo 7:28-29). E multitud a nota e difrensia. Hesus, siendo Dios, a papia ku outoridat di Dios. Su palabranan tabata outoritario.

Difisilmente hende onesto por papia i skirbi na un forma kategórico. Motibu pa esei ta pasobra nos ta falta konosementu. Mas bo sa, mas bo sa ku bo no sa. Hende kontinuamente mester bisa “kisas”, “pusibelmente”, “probabelmente”, “kasi sigur”, “mi opinion ta”, “mi ta surgeri”, “mi ta kere”, “mi ta suponé”, “ta parsémi”, èts. Ta interesante ku den su buki, *Descent of Man*, Charles Darwin, originadó di e teoria di evolushon a skirbi “nos por suponé” mas ku 800 biaha.

Hesus konstantemente a hasi deklarashonnan ku outoridat divino. El a bisa, “*Ami ta e kaminda, i e bèrdad, i e bida; ni un hende no ta bin serka e Tata, sino pa medio di Mi*” (Juan 14:6). “*Esun ku kere den e Yu tin bida etérno; ma esun ku no obedesé e Yu lo no mira bida, ma e furia di Dios ta keda riba dje*” (Juan 3:36). “*...si boso no repentí, boso tur lo peresé...*” (Lukas 13:3,5). “*Bin serka Mi tur ku ta kansá i kargá, i lo Mi duna boso sosiegu...*” (Mateo 11:28).

Den Mateo 9:1-8, Hesus a hasi un deklarashon outoritario—un deklarashon ku Dios so por hasi: “*Bo pikánan ta pordoná*” (9:2). Anto, pa proba ku E tin outoridat pa hasi un deklarashon divino asina, el a kura e hòMBER paralísá (9:3-8).

Ma no ta Hesus so ku a papia ku outoridat den Tèstament Nobo. Henter Tèstament Nobo tin e mèsun tono outoritario. Ora un wardadó di prison a hasi pregunta kiko e mester hasi pa e por ta salvá, Pablo no a bisé: “Wèl, mi ta surgerí pa bo kere den Hesus i kisas lo bo ta salba al fin i al kabo.” Alkontrario, sin ningun duda el a bisa na un forma kategórico, “*Kere den Señor Hesus i lo bo ta salvá...*” (Echunan 16:31). Tambe el a skirbi kla kla, “*...pago di piká ta morto, ma e don di grasía di Dios ta bida etérno den Cristo Hesus nos Señor*” (Romanonan 6:23). Eskritor di Hebreonan 9:27 a skirbi, “*...hende ta destiná pa muri un biaha so i despues di esaki ta bin huisio.*” Apòstel Juan no tabatin duda ora el a skirbi den 1 Juan 1:9, “*Si nos konfesá nos pikánan, E ta fiel i hustu pa pordoná nos nos pikánan i pa limpia nos di tur inhustisia.*”

Beibel klaramente ta papia ku outoridat sobrenatural—outoridat di Dios. Esei ta laga e lektor ku solamente dos pusíbel konklushon. 1) Beibel ta falsu, ta gaña, ta pretendé di ta algun ku e no ta...i pues no ta digno di risibí nos atenshon. 2) Beibel ta bèrdad, korekto, ta presis loke e ta bisa...i pues ta papia ku outoridat divino pasobra e ta nada ménos ku Palabra di Dios. No tin otro pusibilidad òf alternativa.

Esaki ta obligá kada lektor—abo—pa evaluá kua konklushon nan ta aseptá. No tin di tres opshon...bo no por keda neutral.

Skritura ta papia ku outoridat divino, demonstrando ku e ta Palabra di Dios.

## **XI. BEIBEL NO A MEHORÁ KU TEMPU**

Splikashon: E echu ku Skritura no a mehorá durante kasi binti siglo ta indiká ku Beibel ta Palabra di Dios.

Henter Beibel (tantu Tèstament bieu komo Tèstament Nobo) a eksistí promé ku aña 100 A.D.—mas ku 1900 aña pasá. Tempu ku Beibel a wòrdu skirbí, bukinan manera nos tin awendia no tabata eksistí. Asta no tabatin papel manera nos tin awe. Pues, no tabatin korant òf revista.

En general, hende lo ta na altura di notisia lokal. Ma kiko di notisia regional òf nashonal? Por dura algun dia promé ku nan por sa loke ta sosodé den nan mes pais. I kiko di

notisia internashonal? Talbes nan lo no sa pa simannan òf lunanan—kisas nunca—kiko ta sosodé na otro parti di mundu.

Medionan moderno di komunikashon tabata totalmente desconosí. Nan no tabatin stensil, emprenta, mashin di taip, kasèt, telegram, faks, video, televishon, radio, telefon. Sigur nan no tabata konosé CD òf DVD, televishon kabel ku koló, mashin di fotokopia, prenter, kalkulador, oloshi, kompiuter, Internet, satélite, GPS, telefon selular, emeil, èts.

David Russell Schilling na luna di aprel, 2013, sitando *Knowledge Doubling Curve* kreá dor di Buckminster Fuller a kompartí: “Te ku aña 1900, konosementu humano a redoblá mas òf ménos kada siglo. Pa fin di Segunda Guera Mundial, konosementu tabata bira dòbel kada 25 aña. Awendia, kos no ta asina simpel pasobra diferente tipo di konosementu ta krese ku diferente rapides. Por ehèmep, konosementu di nanoteknologia ta redoblá kada dos aña i konosementu klíniko kada 18 luna. Komo averahe, konosementu humano ta bira dòbel kada 13 luna. Segun IBM, Internèt lo okashoná redoblamentu di konosementu kada 12 ora.”

Talbes bo a yega di eksperensiá lo siguiente. Bo ta bai kumpra un kompiuter. Bo ta orguyoso ku awor bo tin e teknologia mas atvansá. Ma dia despues ku bo ta kumpra e kompiuter, bo ta tende di un kompiuter nobo ku ta mas sofisticá ku ta hasi bo kompiuter nobo antikuá. Informashon médiko ta kambia rápidamente. Personel médiko tin mester di kursonan regular di aktualisashon i rekapasitashon pa nan por ta na altura di e invenshonnan mas nobo. Ku regularidat, hende ta deskubrí mas i mas tokante nos mes planeta, nos sistema solar i nos universo.

Loke ta notabel ta, apesar di tur e konosementu adishonal, hende no por mehorá Beibel. Inkreiblemente, algun di e eskritornan humano di Skritura tabata hende simpel. Nan no tabata e bekarionan, ekspertonan i intelighentenan di nan era. Sinembargu, e hendenan mas sabí i e kompiuternan mas sofisticá di nos era no por mehorá Skritura...maske algun a purba hasi esei.

Na aña 1819, Thomas Jefferson a produsí un Testamènt Nobo entitulá *E Bida i Étika di Hesus di Nazarèt*. Den e buki aki, ku awendia ta yamá *Beibel di Jefferson*, el a saka tur kontenido sobrenatural for di su “Beibel”—deshasiendo di Hesus Su milagernan, Su resurekshon i Su divinidat. E buki ta rechasá awendia. Na aña 2012, un grupo onónimo a produsí un “Beibel” ku ta favoresé homoseksualnan. Nan a kambia seis òf shete teksto i ta yamá *Queen James Bible (Beibel Reina Santiago)*. Apesar di tur esfuerso pa kambia òf mehorá Skritura, ku tempu, tur esfuerso ta—i lo— frakasá.

E echu ku no por mehorá e Buki aki durante 20 siglo apesar di tur e supuesto mehorashonnan di nos era moderno, ta indiká ku Skritura ta un Buki Divino...ku Beibel ta Palabra di Dios.

## **XII. HENDE NO POR SONDIÁ E SUBLIMIDATNAN DI BEIBEL**

Splikashon: Un otro evidencia ku Beibel ta Palabra di Dios ta e echu ku hende por dominá sierto informashon, kurso òf buki. Ma ta impusibel pa dominá Beibel...demonstrando ku su orígen ta un Fuente mas ayá.

Hende por dominá siensia, medisina, teknologia, historia, geografia, matemátika, lingwístika, èts. Ma ningun hende por dominá Beibel. E ta e úniko Buki ku hende no por dominá. Romanonan 11:33 ta bisa, “*O profundidat di e rikese, tantu di e sabiduria komo di e konosementu di Dios! Ki inskudriñabel Su huisianan ta i insondabel Su kamindanan!*” Isaias 55:8-9 i 1 Korintionan 2:9-14 ta indiká e mésun fakto ku hende no por komprendé e sabiduria di Dios.

Di otro banda, hende por konosé loke Dios a revelá na nan pa nan por komprendé. Ma en realidat, hende no por sondiá e haltura i profundidat di e Buki sublime. Robert G. Lee a skirbi, “Beibel ta e úniko buki ku arte no por dòrna, ku sabiduria no por enrikesé, ku rikese no por oumentá su balor, ku diktado no por destruí, i ku popularidat no por elevá.”

## **XIII. BEIBEL TA ONESTO TOKANTE SU HÉROENAN**

Splikashon: Al kontrario di tendensia humano pa pinta nos héroenan komo perfekto, e Buki divino ta presentá su héroenan na un forma onesto, sin ignorá e manchanan i fayonan di nan bidanan—demonstrando ku Beibel ta Palabra di Dios.

Hende ta pone korona i krans di splendor na kabes di nan héroenan. E griegunan a hasi nan héroenan diosnan. Emperadó romano tabata konsiderá un dios. Tabata bisá di Alejandro e Grandi ku e no por a kiboká. Ta meskos ku héroenan religioso. Segun katólikonan, papa ta infalibel ora e ta hasi sierto deklarashon. Siguidónan di Martin Lutero ta deskribié komo perfekto—meskos ku siguidónan di Juan Calvin.

En kontraste, Skritura ta konta tantu di e bondat di su héroenan komo nan fayonan, pikánan i kibokashonnan. Beibel no ta elevá nan. Ripará algun ehèmpel di esaki:

Nòmber	Positivo	Negativo
Noe	"Noe tabata un hòmber hustu, perfekto den su generashonnan; Noe tabata kamna ku Dios." (Génesis 6:9)	Noe a bira burachi (Génesis 9:20-21)
Abraham	Amigu di Dios (Santiago 2:23)	Inmoralidat ku Hagar (Génesis 16:1-4) A nenga su esposa (Génesis 12:10-20; 20:1-18)
Moisés	A papia kara-kara ku Dios (Eksodo 33:11) Dios a bisa ku Moisés " <i>tabata masha umilde, mas ku tur hòmber ku tabatin riba superfisio di tera</i> " (Numbernan 12:3,7)	A mata e egipsio (Eksodo 2:11-15) Dal e baranka dos biaha (Numbernan 20:1-13)
Samson	E hòmber mas fuerte	Inmoralidat; a hungu ku piká (Huesnan 13-16)
David	Dios a bisa ku David tabata, " <i>...un hòmber konforme Mi kurason, kende lo hasi henter Mi boluntat</i> " (Ac 13:22)	Adulterio i matamentu (2 Samuel 11)
Salomon	E hòmber mas sabí	1000 esposa i konkubina ku a pon'é desviá for di Dios (1 Reinan 11:1-6)
Pedro	Un lider entre e apòstelnan—nan vosero	A nenga Hesus (Mateo 26:69-75)
Pablo	Apòstel inkansabel ku e skirbi hopi di Tèstament Nobo	El a persiguí iglesia (Echunan 8:1; 9:1-2) Desakuerto ku Barnabas (Echunan 15:36-41)

Tendensia humano ta pa blancha e fayonan di nos héroenan, pa halsa nan i pone nan riba un pedestal. Ma Beibel ta papia bèrdat di su héroenan. E no ta ignorá nan pikánan i fayonan.

Riba su mes, esaki no ta proba konklusivamente ku Beibel ta Palabra di Dios. Ma sigur e ta demonstrá ku Skritura ta evitá e tendensia humano, mustrandu dede den direkshon ku Beibel tin un Outor divino.

#### **XIV. E ESKRITORNAN DI BEIBEL TA KREÍBEL**

Splikashon: E eskritornan humano di Skritura ta hende ku nos por kere i konfia, indikando ku Beibel ta un Buki divino.

Dios a skohe hopi diferente tipo di hende pa ta e eskritornan humano di Skritura. Ma tur di nan tabatin ún kos en komún. Nan tabata hende kreíbel i konfiabel. Kiko ta indiká esaki? Laga nos pensa tokante e eksritornan humano di Tèstament Nobo:

##### **A. E ESKRITORNAN HUMANO TABATA TESTIGUNAN**

E apòstelnan no a skirbi loke otro hende a konta nan òf a purba konvensé nan. Nan a skirbi loke nan a mira i tende personalmente ku nan mes wowonan i oreanan. Nan tabata hende kreíbel, pasobra nan tabata testigu di e eventonan. Maske esei probabelmente no tabata e kaso ku Lukas, no tin ningun duda ku Lukas a entrevistá testigunan di e eventonan ku el a deskribí i tabata sumamente bon dokumentá komo un historiadó.

##### **B. E ESKRITORNAN HUMANO MESTER A WÒRDU KONVENSÉ PROMÉ LOKE TA BÈRDAT**

Loke e apòstelnan a skirbi, no tabata un komplèt ku a originá ku nan. Nan no tabatin meta ku nan tabata ke logra i pues a fabriká un storia pa nan por alkansá nan meta. Nan no tabatin ningun pensamentu mes pa purbá konvensé hende ku un fábula òf storia inventá ta bèrdat.

En kontraste, nan mes tabata masha floho pa kere ku sierto evento a tuma lugá. Nan mester a wòrdu konvensí promé ku nan lo kere. Ora e muhénan a regresá for di graf di Hesus bisando ku graf ta bashi i ku nan a enkontrá Hesus resusitá, nan reakshon tabata “*e palabranan aki a parse nan ko’i loko i nan no a kera nan*” (Lukas 24:11). Si e evidensia no a konvensé nan, nan lo no a kere. Tomas a afirmá abiertamente tokante Hesus resusitá “*Si mi no mira den Su mannan e marka di e klabunan i hinka mi dede den e lugá di e klabunan i hinka mi man den Su kustia, mi no ta kere.*” Ma un siman despues, ora Hesus a presentá nan dilanti, Tomas tabata konvensí ku Hesus di bèrdat a resusitá, bisando, “*Mi Señor, i Mi Dios*” (Juan 20:25-28).

E apòstelnan tabata hende kreíbel pasobra nan mes mester a wòrdu konvensé promé.

### **C. E ESKRITORNAN HUMANO TABATA TAN IMPRESHONÁ KU E EVENTONAN KU NAN NO POR A IGNORÁ E FAKTONAN**

Hesus Su milagernan, echunan i palabranan tabata asina impaktante ku nan no por a ignorá nan. Hesus Su resurekshon a hasi un impreshon asina grandi riba nan ku nan no por a ignorá e evidensia. E echu ku e eventonan tabata tan impaktante ku nan no por a ignorá nan ta indiká ku e eskritornan humano di Tèstament Nobo tabata hòmbènan kreíbel.

### **D. E ESKRITORNAN HUMANO TABATA HENDE SPIRITUAL, DEBOTO, SINSERO I ONESTO**

Para ketu i pensa kiko e apòstelnan a logra personalmente dor di skirbi e bukinan di Tèstament Nobo. Nan a haña rekonosementu òf un suma grandi pa imprimí loke nan a skirbi? Sigur ku nò! Echu ta ku no tabatin ganashi personal pa e eskritornan humano di Skritura. Di bèrdat, lo tabata mas bentahoso pa nan *no* skirbi!

Hopi di e apòstelnan a wòrdu ehikutá pa motibu di nan testimonio tokante Hesus. Segun tradishon, kada un di e apòstelnan a muri komo martir ku eksepshon di Juan. Si nan tabatin duda ku loke nan a skirbi ta bèrdat i ta Palabra di Dios, nan nunca lo tabata despuesto pa muri pa loke nan skirbi. Si nan a kere ku loke nan a skirbi ta un fábula, un komplèt, djis un storia interesante, nan lo tabata loko pa muri pa e kerensia ei. Ma echu ta, nan tabata konvensé ku loke nan a skirbi ta 100% bèrdat.

E eskritornan humano di Beibel tabata hende sinsero i deboto. Òf nan tabata sinseramente gañá òf nan tabata sinseramente korekto.

## **XV. UNIDAT DI BEIBEL**

Splikashon: E unidat di Beibel ta proba ku Skritura a originá ku Dios.

E unidat di Skritura ta nada ménos ku milagroso. Pa nos por komprendé esaki, nos mester mira promé e variedat den Palabra di Dios:

### **A. DIFERENTE ESKRITOR HUMANO I RANGO SOSIAL**

Tabatin aproksimadamente kuarenta diferente hòmbèr ku Dios a usa pa skirbi e palabranan di Skritura. Bidanan di e hòmbènan aki tabata tan variá. Algun tabata riku, otronan tabata pover. Algun tabata bon eduká, otronan tabatin ménos edukahson.

- Moisés—bon eduká na Egipto; prens den palasio ku a bira lider di Israel
- Josué—komandante di ehersito
- Samuel—profeta, hues
- David—wardadó di karné, sòldá ku a bira rei
- Salomon—prens ku a bira e rei mas sabí
- Esdras—eskriba, bon eduká
- Nehemias—koperu di rei, gobernadó

- Isaias—profeta, lider religioso
- Ezekiel—saserdote
- Daniel—un katibu di Juda, bon eduká na Babilonia, a bira promé minister
- Amos—wardadó di bestia i plantadó di palu di figo—ménos eduká
- Nahum—for di Nazarèt; ménos eduká
- Mateo—kobradó di belasting
- Lukas—médiko; historiadó eksperto; bon eduká
- Juan—piskadó; probabelmente ménos eduká
- Pedro—piskadó; ménos eduká
- Pablo—Fariseo; bon eduká—alumno di professor Gamaliel
- Judas—for di Galilea

## **B. DIFERENTE ERA**

Beibel a wòrdu skirbi durante un periodo di 1600 aña. E eskritornan humano tabata separá for di otro dor di tempu i dor di diferente manera di pensa. Shenes di aña a pasa entre skirbimentu di algun buki di Beibel. Poko di e eskritornan di Tèstamènt Bieu a konosé otro.

## **C. DIFERENTE PAIS**

E eskritornan humano a skibi na diferente lokalidat. Di bèrdat, Beibel a wòrdu skirbí na tres kontinente: Asia, Oropa, i Afrika. Moisés a skirbi siendo den desierto entre Egipto i e Tera Primintí. Samuel, David i Salomon a skirbi tempu ku tur 12 tribu a forma un solo nashon. Oseas a skirbi tempu ku Israel a bira e nashon di nort. Isaias, Jeremias i Habakuk tabata lokalísá na Juda—e nashon di sùit. Ezekiel i Daniel a skirbi durante kaptividat na Babilonia. Daniel tambe a skirbi durante impero medo-persia. Ester, Esdras i Nehemias a biba den mesun era di medo-persia. Pablo a skirbi for di diferente sitio na impero romano: Korintio, Filipos, Roma, Masedonia, Atenas, Laodisea. Juan tabata prisionero na isla di Patmos ora el a skirbi Revelashon.

## **D. DIFERENTE SIRKUMSTANSIA**

Eskritornan human di e Buki divino a skirbi bou di diferente sirkunstansia. Algun tabata den palasio (Salomon), mientras otronan tabata den prison (Pablo). Tin eskritor ku tabata den desierto (Moisés), i otronan den stat (Nehemias). David a skirbi den tempu di guera—Salomon a skirbi den tempu di pas. Daniel tabata deportá—mientras otronan tabata den nan propio pais (Samuel). Tin ku a skirbi ku peliger di morto (Jeremias); ma otronan no a eksperensiá menasa (Lukas).

## **E. DIFERENTE IDIOMA**

Skrituranan tabata skirbí na tres diferente idioma originalmente. Mayoria di Tèstamènt Bieu tabata skirbí na idioma hebreo. Ma tin sekshon ku a wòrdu skirbí originalmente na idioma arameo (Esdras 4:8–6:18; 7:12-26; Jeremias 10:11 i Daniel 2:4–7:28). Tèstamènt Nobo, en kontraste, tabata skirbí na griegu so.

Kada lenga tin diferente manera di papia, diferente ekspreshon, diferente dicho, èts. Diferensia di idioma tambe ta kontribuí na diferensianan den kultura.

## **F. DIFERENTE TIPO DI LITERATURA**

Beibel ta kontené diferente soroto di literatura: narashon (storia, drama), novela, diskurso, instrukshon, poesia, filosofia, himno, lógika, profesia, biografia, èts. Algun eskritor a skirbi na un manera simpel. Otronan a hasi uso di palabranan mas grandi i eksakto—reflehando nan nivel di edukashon.

## **G. DIFERENTE LEKTOR**

Awendia, outornan ta skirbi buki pa sierto hende: médikonan, científikonan, eksperto di kompiuter, atletanan, mamanan, mayornan, biaheronan, alumnonan, muchanan di sierto edat, èts. Algun parti di Skritura tabata skirbi pa sierto lektor.

Tin buki di Beibel ku tabata skirbí spesífikamente pa hudiunan, manera Mateo i Santiago. Tambe Tèstament Bieu tabata skirbi prinsipalmente pa hudiunan. Ma algun buki di Tèstament Bieu tabata dirigí pa sierto hende, por ehèmpel, nashon di Juda, òf eksilionan na Babilonia, èts.

Otro bukinan den Palabra di Dios tabata skirbí prinsipalmente pa paganonan (hende ku no ta hudiu). Pablo a skirbi su kartanan prinsipalmente pa hende ku no tabata hudiu.

Tambe tin buki ku tabata skirbí pa un solo persona. Originalmente, Lukas a skirbi su evangelio i e buki di Echunan pa Teófilo. Pablo a skirbi 1 i 2 Timoteo, Tito i Filemon pa sierto persona.

Apesar di tur esei, Skritura ta papia un idioma universal—maske e por ta skirbí pa un persona òf henter un nashon. E buki ta tokante santunan i pekadónan. E ta un buki pa kada era. Tur hende por benefisiá for di tur e bukinan.

## H. DIFERENTE TÓPIKO

Beibel ta trata ku hopi tópiko: teologia, étika, filosofia, siensia, astronomia, biologia, edukashon, fisika, matemátika, geografía, sistema hurídiko, gobièrnu, finansa, relahon laboral, matrimonio, famia, yunan, èts. Beibel tambe ta papia tokante hopi diferente doktrina: Dios, trinidad, hende, e kaída, angelnan, demonionan, Satanas, shelu, fièrnu, tempu, etèrnidad, eventonan futuro, loke ta natural, loke ta spiritual, iglesia, boutismo, sena di Señor, lidernan di iglesia, piká, salbashon, hustifikashon, konfeshon, pordon, èts.

Loke ta asombrante ta ku apesar di tantu variedat, Beibel ta 100% uní. Ningun teksto di Skritura ta kontradisí otro.

Pakiko esaki ta tan asombrante? Bo konosé dos hende ku tin pensamentu i kreensia identiko tokante tur kos? Asta hende kasá pa tantu dékada tin diferensia di opinion. Si 40 dòkter òf mekániko òf abogado a disidí pa skirbi ún buki tokante nan trabou, ta klaro ku nan lo no ta 100% di akuerdo ku otro. Ma ta milagroso ku 40 hòmber ku diferente empleo, bibando na diferente pais, skirbiendo bou di diferente sirkunstansia, na diferente idioma, hasiendo uso di diferente sorto di literature, skirbiendo pa diferente lektor, sin konosé otro i *tòg no ta kontradisí otro!*

Imaginá ku bo ta duna instrukshon pa 40 diferente persona na diferente parti di mundu pa manda piesa di outo na bo adrès. Nan mes por skohe kua piesa, modelo, i koló nan ke manda. Algun ta manda piesa grandi, mientras otro nan ta manda piesa chikitu. Mayoría ta manda ún piesa so, ma tin hende ku ta manda vários piesa. Ora tur e piesanan ta yega na bo adrès, bo ta deskubrí ku tur 40 a manda piesa pa presis e mésun modelo i koló di outo. Bo ta hinka tur e piesanan den otro i ta realisá ku no tin piesa di mas i ningun piesa ménos. E piesanan ta eksaktamente loke bo tin mester pa traha un outo. I ora bo a hinka tur e partinan den otro, e outo ta kore perfekto. Kiko lo bo konkluí? Bo lo yega na konklushon ku *mester* tabatin ún person ku a plania tur esaki. Simpelmente ta impusíbel ku esei por a sosodé pa kasualidat!

Esei ta e milager di Beibel. Bo no por kita ni buta. Skritura ta presis loke ta nesesario. E unidat di Beibel ta proba ku Skritura ta *mester* tin un Outor pa e Buki divino.

Promé ku nos ta kita for di e tópiko aki, ta importante pensa un ratu tokante e supuesto kontradikshon den Skritura.

Nos ta sali for di punto di bista ku pasobra Beibel tabata skirbí pa un Outor divino, tur kos ku tin den Beibel ta harmonisá ku otro di un manera òf otro. Pasobra Dios su pensamentu ta muchu mas haltu ku pensamentu di hende, tin kos ku nos nunca lo komprendé durante e bida aki. Ma kiko di loke ta kontradisí otro, loke no ta harmonisá, kontradikshonnan den Beibel?

Un kontesta simpel pa esaki ta lo siguiente. Ora bo ta enkontrá un supuesto kontradikshon, bo por sa sigur ku tin dos pusibilidat: 1) *Abo* ta falta informahon ku ya kaba a

wòrdu deskubrí pa splika e supeusto kontradikshon. Ma tin un otro pusibilidat: 2) *Tur hende* ta falta informashon ku ta splika e supuesto kontradikshon. Un bentaha pa esnan ku tin nan edat ta ku durante nan bida, nan por a opservá ku despues di tempu, klaridat ta bin. Ora bo ta nota algu den Skritura ku ta parse ku no ta harmonisá ku otro teksto, tene pasenshi! Tin un bon splikashon! Un dia un hende lo deskubrí sierto bèrdat ku ta pone tur kos harmonisá.

Nos por bisa muchu mas tokante kontradikshonnan, ma esei ta un tópiko pa un otro estudio.

## **XVI. BEIBEL TA INDESTRUÍBEL**

Splikashon: E echu ku Beibel a sobreviví tur oposishon i persekushon ta indiká ku e ta un Buki ku Dios a protehá, demonstrando ku e ta Palabra di Dios.

Durante e sígionan, semper Beibel tabata un Buki odiá. Fo'i tempu ku el a wòrdu skirbi, hende a purba destruí. Ma apesar di tur esfuerso pa deshasí di e Buki Divino, tòg e ta sobreviví te awendia. Di bèrdat, ta un milager ku nos tin Beibel awe! Echu ta ku:

### **A. BEIBEL TA SOBREVIVÍ APESAR DI PERSEKUSHON**

Fo'i su komienso, hende a odia Palabra di Dios. Skritura mes ta mensioná un kaso ku un rei a purba deshasí di Skritura. Mas òf ménos na aña 600 B.C., Joakim, un di e último reinan di Juda, a haña sa tokante e Skrituranan ku Jeremias tabata skirbi. Ma e no a gusta loke el Jeremias a skirbi. El a laga un persona lesa algun kolumna di e ròl, i despues el a kim'é. El a buska pa arestá Jeremias, ma Dios a protehé. Anto Dios a duna Jeremias e mesun informashon pa e bolbe skirbi loke rei a kima. Por haña e storia den Jeremias 36.

Na aña 168 B.C., rei Antiochus IV di e seleusidanan a duna òrdu pa “kibra na wèrki i kima” e “Bukinan di Lei” hudiu ku nan a haña na Herusalèm. Esaki a kontribuí na inisio di e revolushon makabeo.

Diocletian, emperadó romano (284-305 A.D.) tabata desididu pa destruí kristianismo. E persekushon a kuminsá 23 febrüari, 303. El a duna òrdu pa kima tur kopia di Beibel i tur literature kristian. El a logra ehikutá asina tantu kristian i kima tantu Beibel ku el a laga traha un moneda ku e palabranan, “E religion kristian ta destruí i e adorahson di diosnan ta restorá.”

Na Inglatera, William Tyndale tabata konvensé ku “Tur hende mester tin oportunitat pa lesa Palabra di Dios, asta e hòmber ku ta plug.” P'esei el a kuminsá tradusí Tèstament Nobo na ingles. Ma nan a oponé kontra dje na Inglatera. El a muda pa Alemania, a kompletá e tradukshon ingles di Tèstament Nobo, a impremí esaki i na skondí a transport'é bèk na Inglatera. Obispo di Londres, Cuthbert Tunstal, na òktober 1526 a kima e Skrituranan ingles ku e por a haña. Nuebe aña despues, Tyndale tabata kimá staka.

Papa katóliko a duna òrdu pa kima Martin Lutero su tradukshon di Beibel na idioma Aleman na aña 1624. Esaki a sosodé na sierto parti di Alemania.

Ma aña 1731, arsobispo di Salzburg, Leopold Anton von Firmian, a lansa un persekushon salvahe kontra siguidónan di Martin Lutero. El a deporta hopi Protestant for di Salzburg i a konfiská i kima tur literature i Beibel Protestant.

Beibel tabata un Buki prohibí na hopi pais katóliko. Ora mi mayornan a inisiá nan ministerio na Boneiru na aña 1952, mi tata a parti Tèstament Nobo na tur kas na e isla. Pastor katóliko a bin den kas i a bai ku e Tèstament Nobo ku e por a haña. Oposishon katóliko a kontinuá te Vatikano II (1964).

Pa hopi dékada, komunistanan na Union Sovietiko, Oropa oriental, Cuba, China, partinan sùit ost di Asia, kreyentenan tabata persiguí severamente i Beibelnan konfiská i destruí. Durante dékada 1990, hopi di e paisnan aki a haña libertat. Kua buki nan a deseá? Beibel! No tabata pusibel pa proveé sufisiente Beibel pa satesfasé e hamber pa Palabra di Dios.

Awendia, Beibel ketu bai ta un Buki prohibí na diferente nashon. Kristiannan por ta severamente kastigá òf ehikutá pasobra nan tin òf ta lesa Palabra di Dios. Skrituranan ta konfiská i destruí.

Ma apesar di tantu esfuerso di parti di hende ku ta odia Skritura, ketu bai Beibel ta sobreviví!

## **B. BEIBEL TA SOBREVIVÍ APESAR DI OPOSISHON FILOSÓFIKO**

E filósofo griegu, Celsus, durante e di dos síglo a purba destruí Skritura ku su abilitat mental. El a skirbi un buki kontra kristianismo entitulá *E Palabra Bèrdadero*. Origen a refutá e buki ei den su buki *Contra Celsum*.

Lucian (125-180 A.D.) a purba destruí Skritura dor di su sarkasmo i bofon.

Porphyro (233-305 A.D.) tambe a hasi su best pa destruí Palabra di Dios ku su skirbimentu. El a skirbi 15 buki kontra kristianismo, espesialmente kontra Beibel.

E outor i filósofo franses, Voltaire (1694-1778), a bisa ku a dura síglonan pa konstruí kristianismo, ma “mi lo demonstrá kon un solo hòMBER franses por destruí den shen aña.” Hasiendo uso di su pèn di inkredulidat, el a ataká Dios i Skritura. Ménos ku 50 aña despues di Voltaire su morto, Sosiedat di Beibel di Ginebra a usa su kas i emprenta pa imprimí Beibelnan. Despues e edifisio a bira e sentro di Paris pa British and Foreign Bible Society (un sosiedat di Beibel). Ta interesante pa agregá ku seis di Voltaire su bukinan a bende pa 90 sèn, mientras miónes di hende ta kumpra Beibel ketu bai.

Thomas Paine (1737-1809) a skirbi su buki, *The Age of Reason* (1794), (*Era di Rasonamentu*). El a skirbi, “E buki aki lo destruí Beibel. Dentro di shen aña, por haña Beibel solamente den museo...” Ma su buki a hasié sinti asina miserabel ku el a bisa, “Si mi tabata por, lo mi a duna mundunan kompleto si mi no a skirbi *The Age of Reason*.” Paine a muri na aña 1809, ma Beibel ta sobreviví!

E palabranan venená di hende inteligente no por destruí Beibel.

## **C. BEIBEL TA SOBREVIVÍ APESAR DI TEMPUS**

Ademas, ta importante pa kòrda ku e manuskritonan original di Skritura no tabata skirbí riba papel. Papel no tabata eksistí ainda. Pues, e Skrituranan tabata skirbí riba material ku no tabata duradero. E tekstonan original tabata skirbí riba dos tipo di matrial: 1) Papiro. Esaki tabata richi plèchá i pegá huntu. Maske un pidi di papiro ta eksistí ainda for di aña 2400 B.C., en general papiro no ta masha duradero, sino ku e ta wardá den un lugá seku. 2) Tambe hende den pasado a skirbi riba kuerunan. Maske kuerunan ta mas duradero ku papiro, tòg esaki tampoko no ta duradero.

Ningun hende tin un manuskrito original di Skritura. Un motibu ku nos no tin e tekstonan original ta simpelmente pasobra ku tempu e papiro i kuerunan riba kua nan a wòrdu skirbí ta bira bieui.

Ma apesar di e echu ku Beibel a wòrdu skirbí riba material no-duradero, tòg nos tin e awendia, pasobra hende a kopia i bolbe kopia e teksto pa miles di aña promé ku imprentá a wòrdu inventá.

Hudiunan a preservá e teksto di Tèstament Bieu ku masha kuidou. Nan tabatin hende ku a tren spesífikamente pa kopia e teksto pa preservá Skritura. E hendenan eksperto aki tabata sumamente kouteloso. Nan a konta kada paragraph, kada palabra, kada lèter. Nos por ta sumamente agradisidu pa nan koutela pasobra komparando nos teksto moderno ku e manuskritonan antiguo ku ta preservá ainda di Tèstament Bieu, nos sa ku loke tin skirbí den nos Beibel Santu ta idéntiko ku e teksto hebreo antiguo.

Preservashon di e teksto di Tèstament Nobo ta henter un otro storia. Tin mas ku 13.000 kopia òf parti di manuskritonan di Tèstament Nobo. E fragmento mas antiguo di Tèstament Nobo ku nos konosé ta fechá ménos ku 50 aña despues ku e teksto original a wòrdu skirbí. (Manuskrito di John Ryland ta un pida di evangelio di Juan, fechá 130 A.D. Buki di Juan tabata skirbí entre 80-90 A.D.)

Esnan ku a kopia e manuskritonan di Tèstament Nobo no a hasi esaki ku e mésun eksaktitut ku e kopiadónan hudui pa ku Tèstament Bieu. Ma nos tòg sa ku hopi siguridat ku loke ta skirbí den nos Tèstament Nobo na Papiamento ta idéntiko ku e palabra griegu di e teksto



original pasobra nos tin asina tantu manuskrito. Komparando ún manuskrito ku otro, ekspertonan lingwístiko por opservá si tin variashon. Dor ku tin tantu manuskrito pa kompará, no tin masha duda kiko e teksto original a bisa.

Si nos ta kompará e kantidat di manuskritonan antiguo konosí di Tèstamènt Nobo ku e kantidat di manuskritonan konosí di otro skirbimentu antiguo, nos por mira kon remarkabel Tèstamènt Nobo ta...i na mésun tempu, kon konfiabel e teksto di Tèstamènt Nobo ta.

Outor	Fecha Skirbí	Fecha di Kopia Mas Antiguo	Lapso di Tempu	Kantidat di Kopia
Plato— <i>Tetralogies</i>	427-347 B.C.	900 A.D.	1200 año	7
Pliny— <i>Historia</i>	61-113 A.D.	850 A.D.	750 año	7
Thucydides-- <i>Historia</i>	460-400 B.C.	900 A.D.	1300 año	8
Aristotle	384-322 B.C.	1,100 A.D.	1400 año	5
Demosthenes	383-322 B.C.	1100 A.D.	1300 año	200
<b>Tèstamènt Nobo</b>	<b>40-100 A.D.</b>	<b>130 A.D.</b>	<b>50 año</b>	<b>13.000</b>

Hende ta hasi bofon di Beibel, afirmando ku Beibel no ta konfiabel. Ma na mesun tempu nan ta asina sigur ku diferente teksto di un òf otro outor antiguo ta 100% korekto. Di bèrdat, ningun otro dokumento antiguo por kuminsá gaba ku e ta tan bon preservá ku e teksto di Skritura. Isaias a skirbi, “*Yerba ta seka, flor ta marchitá, ma palabra di nos Dios ta permanesé pa semper*” (Isaias 40:8). Hesus a bisa, “*Shelu i tera lo pasa, ma Mi palabranan lo no pasa.*” “*Pasobra di bèrdat Mi ta bisa boso, te ora ku shelu i tera pasa, ningun yota ni tilde di e Lei lo no pasa, te ora ku tur kos keda kumpli*” (Mateo 24:35; 5:18).

E echu ku Beibel a sobreviví milagrosamente apesar di persekushon, apesar di oposishon filosófiko, i apesar di tempu, ta mostra dede den direkshon di e echu ku Beibel ta Palabra di Dios! Emperadónan, reinan, prensnan, papanan, kardinalnan, obisponan, filósofonan, hende sabí—tur a purba destruí Skritura. Nan tur a muri. Ma Beibel ta sigui eksistí!

Bernard Ramm a skirbi, “Mil biaha klòk di misa a bati pa anunsia morto di Beibel, tabatin entiero di Beibel, a pone nòmber di e defunto riba graf... Ma di un òf otro manera, e kurpa no ta keda den graf.”

Beibel ta indestruíbel. E echu ei ta indiká ku Beibel ta nada ménos ku Palabra di Dios!

## XVII. SIENSIA TA KOMPROBÁ LOKE BEIBEL TA BISA

Splikashon: E eksaktitut di Skritura su referensia na siesia ta evidensia adishonal ku Beibel ta Palabra di Dios.

Tin hende ku ta bisa ku Beibel i siensia ta kontradisí otro. Ta bèrdat ku lidernan religioso a oponé kontra Copérnico i Galileo. Ma nan ideanan tabata basá riba pensamentunan di Aristóteles, no riba Beibel.

Beibel no ta un Buki di siensia. Ma ora e Buki divino ta papia tokante siensia, e ta científicamente korekto.

Tin diferente rason ku ta parse ku siensia i Beibel ta kontradisí otro. Un motibu ta hende su falta di konosementu. Dios ta omnisiente—E sa tur kos. Hende nò! E konosementu di hende—asta e persona mas inteligente—ta limitá. Tin hopi fakto científico ku hende no a deskubrí ainda. Ora Beibel ta bisa algu ku ta parse ku e ta kontradisí siensia, ta pusíbel ku siensia ainda no a deskubrí loke Dios ta bisa. Por tuma tempu pa e bèrdat sali na kla. Talbes e bèrdat lo no wòrdu deskubrí—i e kontradikshon resové—durante bo bida. Ma tempran òf lat—awor òf den etèrnidat—tempu lo yega ku nos lo mira Dios i Skritura tin rason.

Otro motibu pa loke ta parse un kontradikshon entre Beibel i siensia ta ku algun científico ya kaba ta influensia pa sierto filosofia promé ku nan ta hasi nan estudio. Un bèrdadero científico, ta hasi un estudio imparcial i ta sigui e lógika di loke e ta deskubrí te ora ku e yega na su konklushon lógiko, irrespekto di su opinion personal of filosofianan fundamental.

Ma tin científico no ta pensa asina. Nan no ta imparcial. Nan ya kaba a forma nan opinion i ta purba forsa tur fakto científico pa harmonisá ku nan opinion. Si bo tin brel ku glas kòrá bistí, tur loke bo lo mira ta koló kòrá. Si bo punto di salida ta ku evolushon ateístiko ta

bèrdat, anto outomátikamente lo bo rechasá deskubriméntunan i estudionan científiko ku ta mostra dede den direkshon di Dios, pasobra esei no ta harmonisá ku bo filosofía fundamental di evolushon ateístiko. Nan ta buska un manera pa splika loke nan a deskubrí na un manera ku ta harmonisá ku evolushon.

Awendia ku frekuensia polítika ta hunga un ròl den siensia. Algun polítiko ta suskribí na e kreensia ku mundo ta bira mas i mas kalor i aki poko aña tur e eis di sùit i nort pol lo dirti i kubri nos islanan ku awa. Motibu ku nan ta suskribí na e kreensia ei ta pa kousa di nan doktrina di sosialismo—deseando pa nashonnan riku duna mas na paisnan ku ménos rekursu. Komo resultado, científikonan ta haña nan obligá pa no hasi nan estudio na un forma imparzial, ma pa fasilidat politikonan.

Ta importante pa komprendé ku ora ta parse ku siensia i Skritura ta kontradisí otro, no tin motibu pa pániko. Djis warda ku pasenshi. Tempran òf lat hende lo bin deskubrí ku Dios tin rason i ku siensia bèrdadero ta harmonisá ku Skritura.

Un otro punto ku ta imporante pa komprendé ta ku Beibel ta hasi uso di lenguahe simbóliko òf poétiko...méskos ku tur otro idioma. E echu ei por duna imprehson ku Skritura no ta kuadra ku siensia. Nos tambe ta hasi esei na Papiamentu—nos tambe ta papia asina. Nos ta bisa, “solo a sali” òf “solo ta baha”. E ekspreshonnan ei no ta sientifikamente korekto. Nos tur sa ku solo no ta drai rònt di mundu. Alkontrario, mundu ta drai, i esei ta loke ta hasié parse ku solo ta sali òf baha. Maske e ekspreshonnan ei no ta korekto, nan ta sirbi nan proposito. Ta méskos ku algùn ekspreshon den Beibel.

Kòrdando tur esei, laga nos mira algùn ehèmpel di tekstonan ku ta sientifikamente korekto.

## **A. DIOS A KREA E SHELUNAN I TERA**

Génesis 1:1 ta bisa “*Na prinsipio Dios a krea e shelunan i tera.*” E deklarashon aki a kontradisí opinion popular di hende antiguo. E egipsionan a kere ku mundu a brui di un webu gigantesko ku ta bula den laira. Otronan a kere ku mundu tabata un monster grandi ku a trose di doló ora hende a koba den su banda, okashonnando temblor, volkan, èts. Kua teoria antiguo di origen di mundu ta eksistí awendia? Maske evolushonistanan no ta aseptá e relato bíbliko di kreason, nan no por argumentá ku e echu ku esaki ta e úniko splikashon antiguo ku a sobreviví te awendia...i ainda ta aseptá pa miónes di hende!

Ta bèrdat ku ningun hende tabata presente ora mundu a kuminsá eksistí. Komo resultado, ta impusíbel pa siensia proba konklusivamente kon mundu a originá, pasobra ta impusíbel pa ripití origen di mundu i tèst esaki. Pues, nos por bisa kategórikamente ku kualke teoria di origin ku bo ta kere, bo ta asept’é pa medio di fe.

## **B. MUNDU TA KOLOGÁ RIBA NADA**

E egipsionan a kere ku pilarnan grandi tabata sostené mundu. Segun e griegunan, Atlas a karga mundu riba su skouder. Ma Jòb (probabelmente bibando na tempu di Abraham—4.000 aña pasá) tabata sa ku Dios a “...*kologá tera riba nada*” (Jòb 26:7). Kon Jòb por tabata sa? E por tabata sa solamente si Dios a revelá esei.

## **C. MAS KU ÚN PLANETA**

Tempu ku Tèstament Nobo a wòrdu skirbí, konosementu di planetanan tabata limitá. En general, hende a kere ku mundu tabata plat i ku e shelunan tabata manera un kòmchi di bòlter kabes abou riba superfisio di tera. Nan no tabata sa tokante e sistema solar òf universe. Ma Beibel tabata mas atvansá ku e inteligensia di e era ei. Skritura ta papia di mas ku ún planeta. “*Mundu*” den Hebreonan 1:2 ta literalmente plural. Ta mas korekto pa tradusié “*mundunan*”. Den Hebreonan 11:3, “*mundunan*” ta tradusí korekto—indikando ku tin mas ku ún planeta.

## **D. MUNDU TA RONDÓ**

Kòrda ku na aña 1491, hende tabata hari Cristóbal Colón, pasobra el a kere ku e por yega India dor di nabegá den direkshon wèst. No tabata te 1519-1522 ku Fernando de Magallanes a proba ku mundo ta rondó dor di nabegá rònt mundo.

Ma Dios a indiká 2.500 aña anterior ku mundu ta rondó. Isaias 40:22 ta bisa ku Dios "...ta sinta mas ariba di e sírkulo di tera..." Salmo 103:12 ta duna indikashon di e echu aki tambe ora e ta bisa, "*Mes leu ku pariba ta for di pabou, mes leu El a alehá nos transgreshonnan for di nos.*" Si mundu tabata plat, lo ta pusíbel pa midi kon leu pariba ta for di pabou. Pues, lo ta pusíbel pa midi kon leu Dios "*a alehá nos transgreshonnan for di nos*". Ma pasobra mundu ta rondó, ta impusíbel pa midi kon leu pariba ta for di pabou. I esei ta presisamente e distansia ku Dios "*a alehá nos transgreshonnan for di nos*"...un distansia infinito—un distansia asina leu ku ningun hende no por midi.

## E. KANTIDAT DI STREA

Kuantu strea bo por mira anochi ora luna no ta briya kla i no tin nubia? Ta difisil pa bisa. Astrónomonan ta hasi uso di diferente manera pa konta strea. E kantidat di strea total ku ta visíbel for di mundu sin uso di aparato ta entre 5.000 i 10.000. Esei ta inkluí e streanan ku ta visíbel na tur parti di mundu. Normal, ta pusíbel pa mira solamente 2.500 pa 5.000 strea for di un lokalidat riba un anochi ku no ta nubla.

Ma nos sa ku tin miles, miónes, biónes, triónes, èts di strea adishonal ku wowo humano no por mira sin yudansa di teleskop. I ningun hende sa kuantu mas strea tin ku hende no por mira asta ku yudansa di teleskop super-potente. Jeremias 33:22 ta bisa, "*Meskos ku e ehèrsitonan di shelu no por wòrdu kontá, i santu di laman no por wòrdu midí, asina lo mi multipliká e desendientenan di Mi sirbidó David i e levitanan ku ta sirbiMi.*" E implikashon ta ku tin un kantidat infinito di strea. Maske Dios sa presis kuantu strea tin i asta tin nòmber pa kada un, hende no konosé nan tur.

En kontraste di awendia, den era di Beibel, hende no tabatin ningun idea ku tin biónes i biónes di strea.

## F. GRANDURA DI UNIVERSO

Tempu ku Skritura a wòrdu skirbí, no tabatin nave espasial òf teleskop super-potente. Tòg Beibel a duna di konosé ku no por midi universo.

Kon grandi nos universo ta? Ku tur nos teknologia moderno, ningun hende—ni sietífiko, ni astrónomo—no sa. Nos sa solamente kon grandi e universo **opservabel** ta, hasiendo uso di ku aparatonan super-sofistiká. Kon grandi nos universo opservabel ta? Si bo por biaha ku mésun velosidat ku lus ta biaha—299.792 kilometer pa sekòndu—astrónomonan awendia ta kalkulá ku bo viahe for di rant na un banda di universo opservabel te otro banda di universo opservabel, e viahe ei lo dura 46.000.000.000 aña.

Segun Jeremias 31:37, "*Si e shelunan ariba por wòrdu midí, i e fundeshinan di e tera abou, eksplora, e ora ei lo Mi benta tambe tur e yunan di Israel afó, pa tur loke nan a hasi, Señor ta deklará.*" E implikashon ta ku hende no por midi universo, i hamas lo no por midié!

## G. SEGUN NAN SORTO

Génesis kapítulo 1 ta keda ripití ku Dios a krea "*segun su sorto*" (1:11-12,21,24-25). Ningun hende—ni evolushonistanan—ta desmentí ku matanan, bestinan i hende ta reprodusí "*segun nan sorto*".

Mula ta un bestia interesante. E ta yu di buriku macho i kabai muhé. Ma kasi ningun mula—ni macho ni muhé—por reprodusí. E ta sosodé, ma ta infrekvente. Desde 1527 te ku 2002 (kasi 500 aña) tin solamente 60 kaso dokumentá di mula ku a duna lus. En general por bisa ku mula—algu ku Dios no a traha—no ta reprodusí.

## H. ARKA DI NOE

Dios a bisa Noe a traha un arka pa skapa di e inundashon mundial ku tabata na kaminda. El a instruí Noe presis kiko e largura, hanchura i haltura di e arka mester ta den Génesis 6:15: 300 kodo largu, 50 kodo hanchu, i 30 kodo haltu.

Segun mi ta komprendé, esaki ta e mésun fórmula ku trahadónan di barku moderno ta usa. Nan a deskubrí ku e dimenshonnan aki ta esnan mihó pa stabilitat di un barku den tempestat. Kon Noe por tabata sa esaki mas ku 5.000 aña pasá?

Ademas, Dios a bisa Noe pa usa “*palu di gofer*” pa kontruí e arka (Génesis 6:14). E tipo di palu ainda ta desconosí, ma algun spekulashon ta ku e tabata un sorto di palu di sipres. Sigur e mester tabata un palu duradero. A tuma Noe 120 aña pa konstruí e arka. Si el a usa palu ménos fuerte, e palu lo a kuminsá putri promé ku el a kompletá e arka. Dios tabata sa presis kiko E tabata hasi ora el a duna Noe e instrukshon aki.

## **I. REGLANAN LEVÍTIKO PA LIMPIESA I KUMINDA**

E reglanan ku Dios a duna Moisés pa ku higiena, limpiesa, kuminda, èts. ta probá di ta bon reglanan pa salú den un era ku no tabatin manera pa fria kuminda, èts. Plaganan ta resultá dor for di bakteria ora hopi hende ku ta biba pegá ku otro ta falta higiena, kuminda ku no ta kushiná bon, awa sushi, djaka, èts. Dor di e síglonan, otro partinan di mundu, ignorante di e leinan levítiko, a eksperensia diferente plaga òf otro viro òf bakteria ku a mata miles di hende. Asta awendi, médikonan ta rekonosé ku e dieta preskribí den e buki di Levítiko ta promové salubridat.

## **J. SIRKUMSISHON**

Dios a preskribí sirkumsishon pa yu hòmbenan hudiu di ocho dia di nan bida. Awor médikonan sa ku sanger ta kuagulá mihó e di ocho dia. Kon Israel por tabata sa esei 4.000 aña pasá? Echu ta, nan no tabata sa. Dios a preskribí esaki nèt e dia ei, demonstrando ku Beibel ta Palabra di Dios!

## **K E SÍKLO HIDROLÓGIKO**

Beibel ta papia tokante diferente aspekto di e síklo hidrológiko: awa ta yobe, e ta filtra drenta den tera òf kore bai otro kaminda, e awa ta evaporá, ta kondensá (damp) den nubianan i ta yobe.

Nota algun teksto ku ta trata ku un òf otro parti di e síklo aki: “*E ta hasi damp subi bai ariba for di e finnan di tera; e ta traha lamper pa awaseru...*” (Salmo 135:7). “*Tur riu ta kore bai laman, tòg laman no ta yena, na e lugá for di unda riunan ta bin, aya nan ta bolbe bai*” (Eklestias 1:7). “*Pasobra manera awaseru i sneu ta kai for di shelu, i no ta bolbe ayanan sin muha tera, i ta hasi tera produsí i sprit, i ta duna simian a e sembradó i pan na esun ku ta kome...*” (Isaias 55:10). “*Ora ku E laga Su bos resoná, tin un tumult di awanan den e shelunan, i E ta hasi e nubianan lanta for di e fin di tera; E ta traha strena pa awaseru...*” (Jeremias 10:13).

No tabata e hendenan di Israel ku a deskubrí e síklo hidrológiko 3.000 aña pasá! Tabata Dios ku a inspirá Su Palabra!

## **L. DIFERENTE SORTO DI KARNI**

Segun 1 Korintionan 15:39, “*Tur karni no ta e mesun karni, ma tin un karni di hende, i otro karni di bestia, i otro karni di parha, i otro di piská...*” Pa hopi aña, inkrédulonnan a hari e teksto aki, bisando ku tur karni ta formá di protoplasma i ku no tabatin diferensia. Sientífikonan awendia sa ku e sitoplasma i núklo di sèlnan ta indiká ku tin diferente tipo di karni...ku Beibel tin rason. Lo tabata impusíbel pa hende sa di esei tempu ku Skritura a wòrdu skribí...sino ku Dios a revelá esei.

Beibel no ta un Buki tokante siensia. Ma ora Beibel ta referí na siensia, e informashon ta korekto. Kon esei por ta miles di aña promé ku siensia moderno? Esaki ta mas evidensia ku Beibel ta Palabra di Dios!

## **XVIII. ARKEOLOGIA TA KOMPROBÁ LOKE BEIBEL TA BISA**

Splikashon: E estudio sientífiko di statnan, relikwia, artefaktonan, dokumentonan, èts. di antes pa deskubrí faktonan tokante bida i kulturanan di hende antiguo.

Tin hende awendia ku ta kere ku Beibel ta un kolekshon di fábulnan i ideanan antikuá. Nan ta totalmente ignorante di e echu ku Skritura ta un dokumento histórikamente korekto i konfiabel. Loke arkeólogonan kontinuamente ta deskubrí ta verifiká e bèrdat di Beibel.

Nòmbernan di hendenan i sitionan ku ta aparesé den e Buki divino ta hendenan i sitionan históriko. Arkeólogonan ta deskubrí evidensia ku tal i tal stat a eksistí, ku e eventonan deskribí den Skritura a tuma lugá na e siudat ei, i ku e personanan ligá ku e eventonan ei ta hende ku di bèrdat a biba.

En kontraste, Buki di Mormon ta menshoná hopi sitio i nòmber ku no ta haña den Beibel. E ta papia di statnan ku ta yama Bountiful, Cummorah, Zarahemia, èts. Algun di e hendenan ku Buki di Mormon ta menshoná ta Lamanitanan, Nefitanan, Lehitanan, èts. Mormonnan a duna nòmber na sierto sitio sin evidensia ku ta proba ku esei ta e sitio korekto. Ma ora arkeólogonan—asta arkeólogonan Mormon—ta studia e sitio, nan ta deskubrí ku no tin prueba ku esei tabata nòmber di e lugá ei den pasado. Ningun arkeólogo a yega di deskubrí evidensia ku ta proba ku e sitionan i hendenan deskribí den e Buki di Mormon a yega di eksistí.

Ma Beibel ta totalmente otro! Ta fasinante pa nota loke arkeólogonan ta deskubri, ku ripitidamente ta proba ku Beibel ta histórikamente korekto i bèrdat.

Pèrmitími pa menshoná algun di e último deskubrimentunan. (E deskubrimentunan di 2013-2015 ta menshoná pasobra mi ta skirbí e informashon aki na año 2015.)

Na año 2013, arkeólogonan a haña un kóntra, dos sentimeter den grandura, 15 kilometer nort di Herusalèm, indikando ku esei lo tabata e sitio di Ai ku Josué a destruí (Josué 8). Nan a deskubrí un baki-di-pèrs-wendruíf hopi grandi na Jezreel. Esaki tabata e sitio unda Nabot tabatin su kunuku di wendruíf ku rei Akab a kudishá i hòrta (1 Reinan 21).

Un graf antiguo a wòrdu deskubrí na año 2014. Spekulashon ta ku e ta graf di Esteban, e promé martir kristian (Echunan 7:53-8:2). E mésun año nan a haña un tèmpep na Tel Burna ku ta fechá 1300 B.C. Arkeólogonan a deskubrí loke a sobra di sakrifisio di bestianan na e sitio ku pusibelmente tabata un tèmpep pa Baal, e dios kananeo. Un otro deskubrimentu na 2014 tabata un talisman den forma di bakatòr ku tin nòmber di e farao egipsio, Sheshonq I. Den Beibel, e farao aki ta konosí komo Sisak (2 Krónikanan 12) ku a biba na tempu di Salomon i su yu, Roboam. Den serkania di Gaza, nan a deskubrí figura di seyo den was for di e di dies siglo B.C. ku ta indiká ku David i Salomon tabata mandatarionan prinsipal—manera Beibel ta bisa. (Algun eksperto tabata bou di impreshon ku David i Salomon no tabatin hopi poder òf tabata lidernan fiktísio.)

Durante año 2015, arkeólogonan a deskubrí un seyo na Herusalèm, fechá 3.000 año pasá. Promé ku David a konkistá Herusalèm, e stat tabata konosí komo Jebus, i jebuseonan tabata biba einan. E seyo ta for di era di e jebuseonan (1 Krónikanan 11:4). Na fin di año, un arkeólogo a deskubrí un otro seyo antiguo na Herusalèm. Esaki tabata un seyo di Ezekias. E seyo a bisa, “Pertenesiendo na Ezekias, yu di Akaz, Rei di Juda” (2 Krónikanan 29-33).

Tur e artefaktonan aki ta proba ku Beibel ta histórikamente korekto. Laga nos pensa tokante algun di e deskubrimentunan di arkeólogonan den pasado:

### **A. UR DI E KALDEONAN**

Inkrédulonan a bisa ku Ur di e kaldeonan (Génesis 11:28,31; 15:7)—e stat ku Abraham a bandoná pa bai na e tera ku Dios a primintí—nunka a eksistí. Nan a agregá ku si Ur a eksistí mes, e lo tabata un lugá no mashá sivilisá. Te año 1850, nan a suponé ku Ur tabata lokalísá na Turkia.

Na añanan 1853-1854, J. E. Taylor, Vise-Kònsul Britániko na Basra, Irak, a laga arkeólogonan koba na Tell-el-Muqayyar. Nan a haña dokumentonan di klei ku nòmber di Ur riba nan, obligando nan pa konkluí ku sin duda esaki ta ruínanan di e stat antiguo di Ur. Vários

arkeólogo a kontinuá ku e estudio di e sitio. R.C. Thompson (1918) sigui pa H.R. Hall. Ma tabata C.L. Woolley (1922-1934) ku a hasi un estudio mas kompleto—kobando un área di 1200 pa 675 meters.

Arkeólogonan a deskubrí ku Ur tabata un sivilisashon atvansá. Ur tabata un stat-reino poderoso di Sumer. (Sumer tabata un region lokalísá na Irak awendia.) Hende tabata biba na Ur promé ku año 3500 B.C. (Pues, Ur ya kaba tabata un stat bieu ora Abraham a biba einan, pasobra e siudat tabata eksistí mas ku 1,500 año promé ku Abraham.)

For di e área di 1,200 pa 675 meter ku Woolley a koba, el a kalkulá ku 34.000 hende lo a biba einan. For di esei, el a dedusí ku e poblashon total por tabata 250.000 of asta 500.000. Ur tabatin kanalnan, sikiera tres brùg, arte, edifisionan grandi, tèmpel, biblioteka, èts. Nan a traha ku metal i piedranan presioso. E stat tabatin un sistema gubernamental, legal i matemátika. E tabata un sentro pa agrikultura, industria, komersio, i religion. E ziggurat (un sorto di piramit) na Ur ta un testimonio di nan religion. E tabata 67 meter largu, 50 meter hanchu i 24 meter haltu. Parti ariba tabatin un gròt pa e dios di luna, Nannar.

E kasnan di Ur tabatin dos piso. E piso ariba—unda e famia a biba—tabatin poko bentana. E piso about no tabatin bentana. Einan tabatin e kushina, kamer pa sirbidónan i bishitantenan, un tualèt simpel, un kapel privá, magasin i stal. Den otro palabra, Abraham lo a biba den un bon kas na Ur—no un tèt! E mester a bandoná hopi ora Dios a bis'é pa bandoná Ur.

Maske inkrédulonon no a kere loke Skritura ta bisa, arkeólogonan a proba ku Beibel ta papia bèrdat tokante Ur...ku e siudat a eksistí i ku e tabata un sivilisashon atvansá.

## **B. ABRAHAM I E SIVILISASHON KANANEO**

Inkrédulonon a kere ku Abraham tabata un persona fiktisio i ku e habitantenan di Kanaan tabata tribunan ku a keda muda for di un sitio pa otro (nomade)—ku sigur nan no a biba den statnan, manera Beibel ta indiká.

Ma den síglo 20, arkeólogonan a demonstrá ku e relato bíbliko di Abraham i e sivilisashon ku el a enkontrá na Kanaan ta presis loke Beibel a konta. Maske ningun artefakto a wòrdu deskubrí ainda ku ta proba sin duda ku Abraham a eksistí, Millar Burrows, den su buki *What Mean These Stones?* (Kiko e Piedranan Aki ta Nifiká?) a skirbi, “Tur kos ta indiká ku aki nos tin un persona históriko. ...e nòmber ta aparesé na Babilonia komo un nòmber (usá) den e era ei.”

Arkeólogonan a deskubrí skirbimentu ku nòmbernan di kasi tur e statnan menshoná den Génesis 12-14. Asta nòmbernan di hende importante ku ta bin dilanti den e relato di Abraham den Génesis a wòrdu deskubrí.

## **C. JOSUÉ SU KONKÍSTA DI JERIKO**

Inkrédulonon a ridikulisá e storia ku e murayanan di Jeriko a kai plat abou manera Beibel ta bisa (Josué 6). Mientras John Garstang tabata koba na Jeriko na añanan 1930-1936, el a deskubrí algu asombrante. El a skirbi, “Relashoná ku e punto prinsipal, anto, tin poko duda: e murayanan a kai afó di tal forma ku esnan ku tabata ataká por a pasa riba e ruínanan i drenta e stat.” Esaki ta asombrante, pasobra murayanan di stat no sa kai afó. Nan ta kai paden. Tambe arkeólogonan a ripará ku e stat a wòrdu kimá mas òf ménos na año 1500 B.C.—den era di e eksodo—nèt manea Beibel ta bisa.

## **D. HOREONAN I HETEONAN**

Génesis 36:20 ta menshoná e hendenan horeo den e genealogia di Esau. Inkrédulonon a kere ku nan lo mester tabata hende ku a biba den kuebanan. Ma arkeologia a demonstrá ku nan tabata un grupo prominente di gueronan bibando den era di Abraham, Isaak i Jakòb.

Heteonan ta menshoná mas ku 40 biaha den Tèstament Bieu. Pa hopi año, inkrédulonon a hasi chèrchi di heteonan, hende ku nan a konsiderá fiktisio. Ma arkeológianan a deskubrí ku e heteonan tabata un sivilisashon grandi i riku. Nan reino, den área di Turkia, tabata mes

impresionante ku e reinonan di Egipto i Asiria. Un biaha mas, arekeologia a proba ku Beibel tin rason!

## **E. FECHA DI BUKI DI DANIEL**

Pasobra e profesianan den e buki di Daniel tabata kumpli ku tantu eksaktitut, liberalistanan (hende religioso ku no a kere ku kos sobrenatural no ta sosodé den Beibel) a insist ku e buki di Daniel mester a wòrdu skirbí pa un outor desconosí entre añanan 170 i 164 B.C.—400 aña despues ku algun evento den buki di Daniel a tuma lugá. Dor di pone e fecha ei, esei ke men ku e buki a wòrdu skirbí *despues* ku e eventonan a tuma lugá—i pues, Daniel no ta un buki profético (ningun pronostikashon sobrenatural), sino mas bien un buki histórico...kontando loke a sosodé ya kaba.

Ma ora e Ròlnan di Laman Morto a wòrdu deskubrí na aña 1948, e fecha ei a kai na awa. E Ròlnan di Laman Morto ta fechá dos siglo promé ku Kristu. Ademas, ta opvio ku e ròlnan aki tabata kopianan di otro manuskrito. Pues, e buki di Daniel mester a wòrdu skirbí promé ku e fecha ei. E evidensia ta indiká ku e buki di Daniel a wòrdu skirbí entre añanan 606 i 536 B.C.—presis loke Beibel ta indiká.

## **F. BELSASAR—ÚLTIMO REI DI BABILONIA**

Inkrédulonnan a insistí ku Daniel a kiboká ora el a relatá ku Belsasar tabata e último rei di Impero di Babilonia. E biaha aki, inkredulonnan mes a hasi uso di estudionan di arkeologia. Arkeologonan a deskubrí ku Nabonidus tabata e último rei di Impero di Babilonia. Pues, liberalistanan a insist ku esaki ta mas evidensia ku Daniel no por a wòrdu skirbí 606-536 B.C. Un eksirtor den era di Daniel mes lo no hasi un kibokashon tan grandi, nan a afirmá.

Ma Henry Rawlinson a deskubrí un tábla di klei entre e ruínanan di Kaldea ku nòmber di Belsasar—yu hòmber mayo di Nabonidus. E tábla asta a laga sa ku Nabonidus tabata kasá ku Nitocris (yu muhé di Nabokodonosor—mama di Belsasar). Nabonidus a bira rei despues di Nabokodonosor. Ma el a hasi Belsasar ko-rei i komandante di ehersitonan di Babilonia na aña 550 B.C. mientras e mes tabata bringa na Teima, Arabia. Arkeologonan a bin haña sa ku Belsasar tabata responsabel pa e frontera nort di Babilonia mientras Nabonidus tabata na Arabia. Belsasar i Nabonidus a reina huntu pa 10 aña. Belsasar a wòrdu matá mésun anochi ku e persanan a konkistá Babilonia. Nabonidus a wòrdu kapturá na Borsippa.

Tur esaki ta harmonisá perfektamente ku e relato di Skritura...maske Beibel no ta menta nòmber di Nabonidus. Ta interesante ku Belsasar a priminti un rekompensa pa esun ku por lesa loke e man sobrenatural a skirbí riba muraya. E rekompensa tabata ku e persona ei lo haña e di tres—no e di dos (Daniel 5:7,29,)—puesto den reino di Babilonia. Belsasar no por a dun'é e di dos puesto, pasobra ya kaba tabatin dos rei!

## **G. SKIRBIMENTUNAN DI LUKAS**

William Ramsay a wòrdu siñá ku buki di Echunan no tabata relato di un testigu—ku mas bien, e tabata produkshon di un eskritor mas ku shen aña despues ku e eventonan supuestamente a sosodé. Pues, esaki ta mustra ku e buki ta yen di eror

Ma Ramsay su investigashon a oblig'é pa kambia di opinion kompletamente. El a skirbí, “Lukas ta un historiadó maestral...e outor aki mester tin un lugá huntu ku e historiadónan di mas grandi.” Nos lo sita algun ehèmpel di loke a wòrdu deskubrí tokante Lukas su skirbimentu den Testamènt Nobo: Lukas i Echunan.

Liberalistanan a akusá Lukas di usa e título robes pa e mandatarionan na Filipos. Lukas a usa e palabra griegu PRAETOR den Echunan 16:20,22,34, na lugá di DUUMVIR. Ramsay a demonstrá ku e título PRAETOR tabata usá na e kolonia romano. DUUMVIR ta un di dos ofisial òf magistrado ku ta forma un direktiva òf korte. PRAETOR ta un magistrado romano antiguo ku tin puesto bou di un konsul ku responsabilidatnan prinsipalmente hurídiko.

Lukas a laga sa ku Galion su título tabata prokonsul di Akaya den Echunan 18:12. Segun liberalistnan, esei tabata e título robes. Ma skirbimentu haña na Delfi ta bisa, “Segun Lucius Junius Gallio, mi amgigu i Prokonsul of Akaya...”

Den Echunan 19:23-41, Lukas a skirbi tokante e bochincha den teatro di Efeso. Un inskripshon a wòrdu haña ku ta indiká ku nan a pone ídolonan di plata di Artemis (tambe konosí komo Diana) “den teatro durante reunion kompleto di e Ekklesia”. Arkeologia a deskubrí ku tabatin espasio pa 25.000 hende den teatro di Efeso.

Lukas tambe a skirbi tokante e lamtamentu na Herusalèm pasobra e hudiunan a kere ku Pablo a hiba un pagano den tèmpel (Echunan 21:28). Un bòrchi a wòrdu deskubrí na idiomanan griegu i latin bisando, “Ningun stranhero ta pèrmití pa dreña paden di e barera ku ta rònt di tèmpel. Kualke persona ku tòg ta hasi esei lo ta personalmente responsabel pa a okashoná su mes morto.”

Lukas a yama Publio “*e hòmber prinsipal*” (literalmente “e promé hòmber”) di Malta (Echunan 28:7). Arkeologia a deskubrí skirbimentu ku ta dun’è e título “e promé hòmber.

Ta pusíbel pa duna hopi otro ehèmpel for di e dos dokumento ku Lukas a skirbi, demonstrando klaramente ku Lukas tabata un historiadó eksperto.

Arkeologia ta un siensia ku ta pone na prueba e bèrdat di Skritura. Echu ta ku arkeologia ta demonstrá ku Beibel ta 100% korekto tur biaha! E arkeólogo hudu renombrá, Nelson Glueck, a skirbi, “Por ta bisá kategórikamente ku ningun deskubrimentu di arkeologia hamas a yega di kontradisí e teksto bíbliko.” Si arkeologia por proba sin duda ku Beibel ta kiboká ún biaha so, anto Beibel no ta Palabra di Dios. Ma e evidensia di arkeologia ripitidamente ta konfirmá asta den nos era moderno ku Beibel ta nada ménos ku Palabra di Dios!

## **XIX. PROFESIA TA KOMPROBÁ LOKE BEIBEL TA BISA**

Splikashon: E echu ku Skritura korektamente ta pronostiká eventonan síglonan adelantá, ta un evidensia irefutabel ku Skritura ta un Buki divino.

Ta impusíbel pa hende sa kiko ta bai sosodé den futuro. Hende asta no sa sigur kiko lo sosodé dentro di ún minüt. Nos por rei. Nos por hasi pronostikashon eduká. Ma tòg loke nos ta kere lo sosodé ta insiertu.

Tin hende ku ta purba haña sa tokante futuro dor di astrologia, horoskop, miradó di destino, “psychic”, okultismo, Ouija, spiritismo, bruheria, èts. Algun asta ta pidi pa Satanas su yudansa. Hopi miradó di destino i “psychic” ta simpelmente hende ku tin bon abilidad pa komprendé kiko e ekspreshonnan, gestonan, posishon, èts. di e persona su kurpa ta komuniká. Ku frekuensia, nan pronostikashonnan ta loke e kliente ke tende òf ta asina general ku loke nan ta pronostiká fásilmente lo sosodé.

Mi kiko di profesianan di Skritura? Beibel ta kontené hopi profesia. Gran parti di e bukinan profétiko ta simpelmente predikashi òf deklarashonnan ku Dios ke pa nan hasi. Mas òf ménos 25% di e tekstonan profétiko den Beibel tabata pronostikashon ora el a wòrdu skirbí originalmente.

Profesia den Beibel ta hopi detayá. Algun di e pronostikashonan ta profetisá hopi tempu adelantá: 700, 1500, 2000 òf 2500 aña promé ku e evento a sosodé! Den kada kaso, maske e pusibilidad ku e pronostikashon lo sosodé tabata hopi limitá, e profesia a keda kumplí palabra pa palabra...sin kita, sin buta.

Laga nos pensa tokante e pusibilidad ku un pronostikashon lo sosodé. Si bo ta pronostiká, “Mañan awa lo yobe”, bo tin 1 chèns den 2 (50%) ku bo pronóstiko lo keda kumplí. Ún pusibilidad ta ku awa lo yobe. E di dos pusibilidad ta ku awa lo no yobe.

Si bo hasi dos pronostikashon (“Mañan awa lo yobe i lo hasi kalor”), bo tin 1 chèns den 4 (25% chèns) ku bo pronóstiko lo resultá 100% korekto. Ún pusibilidad ta ku awa ta yobe i tambe ta hasi kalor. E di dos pusibilidad ta ku awa ta kai, ma no ta hasi kalor. Di tres pusibilidad ta ku awa no ta kai, ma ta hasi kalor si. I e di kuaer pusibilidad ta ku awa no ta yobe i tampoko no ta hasi kalor.



Kada biaha ku bo ta agregá un otro pronóstiko, e chèns ku e pronostikashon lo sosodé ta bira ménos. Por ehèmpel, tres pronóstiko ta redusí e chèns ku bo profesia lo wòrdu kumpli 100%. E pusibilidadat ku e pronóstiko lo sosodé 100% ta bira 1 chèns den 8—òf 12,5%. Pues, mas detayá e profesia ta, ménos chèns tin ku henter e profesia lo wòrdu kumpli presisamente manera el a wòrdu pronostiká.

Algund e profesianan di Skritura ta sumamente detayá. E probabilidadat ku henter e profesia lo wòrdu kumpli ta...wèl...impusíbel, sino ku Dios ta obra. I e kos maraviyoso ta ku e profesianan ta keda kumpli 100% korekto, pasobra Dios ta obra...demonstrando ku Beibel ta Palabra di Dios. Laga nos mira algun profesia den e Buki divino:

## **A. PROFESIANAN TOKANTE E TERA PRIMINTÍ**

Inspirá pa Dios, Moisés a skirbi Levítiko 26:31-33 na aña 1520-1400 B.C. E teksto ta deskribí loke lo sosodé ku e Tera Primintí si Israel ta bandoná Dios. *“Tambe lo Mi hasi boso statnan bira ruina i hasi boso santuarionan desolá; i lo Mi no hole boso holónan dushi mas. I lo Mi hasi e tera keda desolá, asina ku boso enemigunan ku ta bin keda biba den djé lo keda tur babuká di mira esaki. Ma boso lo Mi plama entre e nashonnan i lo Mi saka spada tras di boso, i boso tera lo keda desolá i boso statnan lo keda ruiná.”*

En kontraste, Ezekiel 36:33-35 a konta tokante e restorashon di Israel na e Tera Primintí. E teksto aki a wòrdu skirbí na ana 592-570 B.C. i ta bisa: *“Asina Señor DIOS ta bisa: “Riba e dia ku Mi limpia boso di tur boso inikidatnan, lo Mi hasi ku e statnan lo wòrdu habitá i ku e lugánan ruiná lo wòrdu rekonstruí. I e tera desolá lo wòrdu kultivá na lugá di keda un desolashon den bista di tur hende ku ta pasa. I nan lo bisa: ‘E tera desolá aki a bira manera e hòfi di Edén; i e statnan bandoná, desolá i ruiná, awor ta fortifiká i habitá.”*

Ripará e pronostikashonnan prinsipal di e profesia aki: 1) E statnan lo parse tera no habitá òf kultivá (Levítiko 26:31,33). 2) E santuario lo keda desolá (Levítiko 26:31). 3) E tera lo keda desolá (Levítiko 26:32). 4) Enemigunan lo habitá e Tera Primintí (Levítiko 26:32). 5) Israel lo wòrdu plamá (Levítiko 26:33). 6) Persekushon di hudiunan (Levítiko 26:33). 7) Atrobe e hudiunan lo habitá e Tera Primintí (Ezekiel 36:33-35).

Kiko a sosodé? Israel tabata infiel na Dios. Komo resultado, paganonan a tuma poseshon di e tera. Ora esei a sosodé, a parse improbabel ku e profesia por keda kumpli. E paganonan a konstruí kasnan. Asta durante era di e krusadanan (1096-1487 A.D.) tabatin statnan fortifiká akinan ainda. Ma pa aña 1869 e situashon tabata hopi otro. Samuel Clemens (un outor famoso konosí komo Mark Twain) a bishitá e tera i a skirbi lo siguiente den su buki *Innocents Abroad*: “No tin ni ún pueblo solitario den henter e tera—pa 30 mia den kualke direkshon. Tin dos òf tres grupito di tent di arabirnan, ma ni un habitashon permanente. Bo por kore pa dies mia akinan sin mira ningun ser humano.” Clemens asta a sita Levítiko 26:32-34 i a bisa ku e profesia aki sigur a keda kumpli. (Kumplimentu di pronostikashon 1 i 3)

Pa motibu di oposishon di hudiunan fanátiko, e romanonan no tabatin miserikòrdia. “Legionan romano a destruí tur kos ku a representá hudaísmo na aña 70 A.D. E tèmpel a wòrdu destruí i kimá. Asta e romanonan a separá tur piedra for di otro pa nan por rekobrá e oro ku a smèlt den kandela i a kore dreña meimei di e piedranan. Tabatin un matansa di 1,1 mion hudiú i 97.000 a wòrdu tumá komo katibu. Desde e tempu ei, nunca mas e hudiunan a ofresé sakrifisionan. (Kumplimentu di pronostikashon 2)

Ma e hudiunan no a wòrdu plamá. Na aña 135 A.D., Bar-Kobhba a reboltia kontra e romanonan. Komo resultado, Emperadó Hadrian a mata 500.000 hudiú, a konfiská nan terenonan i a bende esei ku paganonan, anto a prohibí tur hudiú di biba na e tera. Asta el a duna e tera un otro nòmber, Palestina. Herusalèm tabata yamá Aeolia Capitolina. Despues di esei, dor di e síglonan, Palestina a wòrdu konkistá diferente biaha. Ma e tera semper a keda den man di paganonan i hende ku a odia hudiunan. (Kumplimentu di pronostikashon 4 i 5)

Plamamentu i persekushon di hudiunan ta bon konosí. Pensa tokante e persekushon di hudiunan dor di e síglonan:

- 613 A.D.—na Spaña kualke hudiu ku a nenga batisá i bira “kristian” a wòrdu deportá for di e tera. Tur mucha hudiu di shete aña òf mas a wòrdu kitá for di nan mayornan i nan a kria e mucha komo “kristian”.
- 632-633—Dagobert, rei di Fransia, a ekspulsá tur hudiu.
- 1096—durante promé krusada. Na Alemania, 12.000 hudiu tabata matá den statnan den serkania di e riu Rin (Rijn).
- 1121—hudiunan tabata ekspulsá di Bélgika te ora nan a repentí di nan kulpabilidadat di mata Kristu.
- 1290—Rei Edwardo I prohibí hudiunan di biba na Inglatera. Nan a forsa 10.000 hudiu pa bandoná e pais.
- 1298-1299—e aleman, Rindfleisch, a bisa ku el a haña instrukshon divino pa mata tur hudiu. Hudiunan tabata persiguí na Fankonia, Bavaria i Oustria. El a destruí 140 komunidad hudiu i a mata 100.000 hudiu.
- 1305—Felipe V a deportá 100.000 hudiu for di Fransia i a konfiská nan propiedat. For di 1322-1359, ofisialmente, Fransia tabata un nashon sin un poblashon hudiu.
- 1348-1350—Hudiunan tabata akusá di a venená pos i ku esei a okashoná e plaga na Fransia, Alemania i Oustria. Nan a kima 2.000 hudiu mata na Strausberg. Seis mil tabata matá na Maintz i un matansa di 3.000 na Erfut.
- 1391—Hudiunan na Spaña tabata obligá pa kombertí na “kristianismo” òf muri. Setenta komunidad hudiu a wòrdu destruí.
- 1483-1492—Durante e Inquisishon Spañó (Spaanse Inquisitie), 200.000 hudiu tabata deportá for di Spaña na aña 1492.
- 1648-1649—Na Ukrania, kosakonan polako a mata 100.000 hudiu i a destruí 700 komunidad hudiu.
- 1939-1945—Durante Segundo Guera Mundial, Alemania tabata responsabel pa morto di mas ku seis mión hudiu—di kua 1 mión tabata muchanan hudiu.

Nos por duna muchu mas ehèmpel di persekushon di hudiunan. Klaramente e profesia di nan persekushon (5 i 6) a keda kumplí.

Ma loke ta asombrante ta ku e storia no ta kaba einan. Despues di 1900 aña, hudiunan a regresá na e tera ku Dios a primintí nan.

Na aña 1927, Floyd Hamilton a skirbi den su buki *The Basis of Christian Faith* (E Fundeshi di e Fe Kristian): “Palestina awe ta un tera di ruínanan. Kasi na ningun otro pais tin tantu ruína di statnan i pueblonan manera na Palestina awendia. E tera ku antes a produsí basta pa un poblashon grandi, awor no ta produsí i no por produsí basta pa un poblashon muchu ménos.” Ma 28 aña despues, George Davis a skirbi den su buki, *Bible Prophecies Fulfilled Today* (Profesianan di Beibel Kumplí Awendia): “E regreso di mas ku ún mión hudiu na e tera di Israel, despues di ta alehá di nan patria antiguo pa kasi 2000 aña, ta un di e milagernan mas asombrante i remarkabel di tur tempu. I e kos asombrante di e regreso moderno di e hudiunan na nan patria ta esaki—e tabata profetisá detayadamente dor di profeta Jeremias 2500 aña pasá.” E ta kontinuá: “Pa hopi generashon, Negev, parti sùit di Israel, ta gran parti un desierto. Tabatin algun pueblo i stat chikitu den Negev, ma gran mayoria di e habitantenan tabata arabir ku a muda tur ora. Awendia, partinan di e tera di Negev ku tabata seku pa hopi tempu, ta kultivá, i gradualmente ta wòrdu transformá for di desierto pa tera fruktifero i fertil.” Ripará ku esaki ta kumplimentu di pronostikashon #7.

Kiko ta e probabilidadat ku e profesianan aki lo ser kumplí. Na aña 1963, profesor Peter Stoner a skirbi un buki entitulá *Science Speaks: An Evaluation of Certain Christian Evidences* (Siensia ta Papia: Un Evaluashon di Sierto Evidensia Kristian). Stoner a kalkulá e probabilidadat ku e shete pronostikashonnan aki lo ser kumplí. El a konkluí ku tabatin solamente 1 chèn den 200.000 ku tur e profesianan aki lo sosodé nèt manera Skritura a bisa. Ún chèn di 200.000—esei ta un pronostikashon ku Dios so por sòru ku e lo sosodé. Ora Beibel ta papia, t’asina mes lo sosodé, pasobra Beibel ta Palabra di Dios!

## B. PROFESIANAN TOKANTE TIRO

Tiro tabata un stat, situá na Laman Mediteráneo, ku un bon haf. Den tempunan antiguo, merkansia a wòrdu transportá entre Oropa, Afrika i Asia dor di e stat di Tiro. Na lugá di nabegá henter e distansia rònt di Afrika, barkunan a trese merkansia for di Oropa i parti nort di Afrika na Tiro. Einan nan a deskargá e barku, transportá e merkansia riba kamindanan te na Laman Kòrá via e stat di Petra, un distansia di mas òf ménos 500 kilometer. Djei nan por sigui transportá e merkansia ku barku pa Asia, i vise versa. Dor ku tantu merkansia a pasa dor di Tiro, e stat a bira masha riku.

Ma Dios a mira Tiro su arogansia i a laga sa ku E ta bai destruí e stat. Ezekiel 26:1-21 (skirbí 592-570 B.C.) ta kontené diferente profesia tokante destrukshon di Tiro: 1) E stat di Tiro lo ta destruí (26:8). 2) Hopi nashon lo bin kontra Tiro (26:3). 3) Tiro lo bira baranka (26:4). 4) Piskadónan lo habri nan reda na e sitio aki (26:5). 5) Ruínanan di Tiro lo wòrdu tirá den laman (26:12). 6) Tiro hamas lo ta konstruí (26:14).

E profesianan aki di Skritura a wòrdu kumplí? Tres aña despues di Ezekiel su pronostikashonnan, Nabukodonosor a rondoná e stat pa 13 aña (585-573 B.C.) Ora su ehersito a logra kibra e portanan di e stat pa nan por dreña, nan a deskubrí ku e stat tabata kasi bashí. Mayoria hende a hui pa un isla ún kilometer for di kosta i a fortifiká e stat ei. Nabukodonosor a destruí e stat di Tiro ku el a logra kapturá. Ma dor ku e no tabatin marina, e no por a konkistá e stat riba e isla. (Esaki tabata kumplimentu di pronostikashon #1, ku Tiro lo ta destruí.)

Ma e stat di Tiro riba e isla a floresé...pa mas ku dos siglo. E isla tabata bon protehá. E habitantenan di Tiro a konstruí murayanan ront di e isla. Tambe nan a traha defensanan bou di awa pa kibra barku di guera ku por ataká nan.

Despues ku Alejandro e Grandi a kaba di konkistá e stat di Sidon, el a yega na e stat-isla di Tiro. Na promé instante, nan a bai di akuerdo ku e lider di e griegunan, Alejandro. Ma ora e tabata ke sakrifiká den nan tèmpel, nan a oponé. Alejandro a demandá pa nan someté. E hendenan di Tiro a nenga. Alejandro a rabia, mata e mensaheronan di Tiro i benta nan kurpanan for di muraya. Anto Alejandro a duna òrdu pa ataka Tiro nobo—e stat-isla.

E griegunan tampoko tabatin marina. P'esei Alejandro e Grandi a disidí di konstruí un brùg di tera mas òf ménos 70 meter hanchu for di e kosta (unda Tiro bieu tabata lokalísá) pa e isla (unda Tiro nobo tabata awor). Pa hasi esei, e griegunan a kibra tur e edifisionan i murayanan di e stat anterior di Tiro i tira tur e ruínanan den laman. Asta nan a raspa e tera unda Tiro tabata lokalisa te ku nan a yega na baranka pa nan por traha e brùg. Esaki tabata kumplimentu di e pronostikashon #3 (ku Tiro lo bira baranka) i #5 (ku ruínanan di Tiro lo wòrdu tirá den laman).

Ehersito di Tiro a batayá kontra e griegunan tur e tempu ku nan tabata konstruí e brùg, kousando hopi daño. Ma Alejandro porfin a kompletá e brùg. E ataka kontra Tiro a dura shete luna, ma na ougùstùs 332 B.C., e griegunan a logra konkistá Tiro riba isla. Nan a mata 7.000 pa 8.000 habitante di Tiro i a bende 30.000 komo katibu.

Ma esei no tabata fin di Tiro-riba-isla. E stat a lamta atrobe. Diesocho aña despues di Alejandro ku konkistá di Tiro, Antigonos a ataká e stat i konkist'é, na aña 314 B.C. Anto mòslemnan a kapturá e stat. Esaki a okashoná ku durante e krusadanan, nan a konkistá Tiro. Anto e mòslemnan a bolbe konkistá e stat na aña 690 A.D. i a destruí. Klaramente profesia #2 a keda kumpli, ku hopi nashon lo bin kontra Tiro.

Ademas, e prominensia di Tiro riba e ruta di komersio a haña un sla ora Ptolemeo Filadelfo a konstruí un kanal entre e riu Nilo i e Golfo di Suez. Esei a nifiká ku awor por transportá merkansia entre Oropa i Asia via barku so. Merkansia no mester a pasa dor di Tiro mas. E rikesa ku antes Tiro tabata kosechá awor a bai den direkshon di Alexandria, Egipto.

Awe, maske e sitio unda Tiro tabata lokalísá lo ta un bon sitio pa un stat moderno (habitantenan por haña un miòn galon di awa dushi kada dia einan), tin solamente un pueblito pa piskadó. E stat-isla awor no ta un isla mas. Botonan di piskadó ta den e haf. I, presis manera e profesia a bisa, piskadónan ta habri nan redanan riba e barankanan unda e gran stat di Tiro tabata lokalísá antes (pronostikashon #4). Tin un pueblo na e sitio awendia, ma por bisa ku e gran stat di Tiro nunca a wòrdu rekonstruí (segun profesia #6).

Segun profesor Peter Stoner su kalkulashon, tabatin solamente 1 chèns den 75.000.000 ku e profesianan aki lo a wòrdum kumplí. Ma dor ku Beibel ta Palabra di Dios, kada detaye di loke Dios a pronostiká, a sosodé.

### C. PROFESIANAN TOKANTE BABILONIA

Babilonia tabata un stat sumamente importante den tempunan antiguo. E tabata kapital di e impero di e kaldeonan. Babilonia—méskos ku Tiro—tabata lokalísá riba un ruta importante pa transporte di merkansia. Un otro ruta antiguo entre Oropa i Asia a pasa dor di Babilonia. Nabegantenan a trese merkansia na kosta di Laman Mediteráneo, transportá e karga riba kaminda te unda por nabegá riba e riu Tigris—un distansia di mas òf ménos 180 kilometer for di Laman Mediteráneo. Djei, barkunan por a nabegá e riu Tigris pa yega na Golfo Pérsiko...i kontinuá pa Asia. Babilonia tabata lokalísá serka di e riu Tigris. Komo resultado e tabata un stat riku i famoso pa su komersio. (Riu Eufrates tambe a pasa dor di stat di Babilonia.)

E fortifikashonnan di Babilonia tabata sumamente impreshonnante den e era ei. Di bèrdat, nan tabata konsiderá impenetrable. Bintisinku porsheto di e stat tabata rondoná pa muras, preveniendo un atake for di enemigunan for di e direkshon ei. E stat mes tabata 313 kilometer kuadrá—kasi 18 kilometer na tur banda (un distansia di 72 kilometer rònt di e stat). Babilonia a konstruí dos muraya di defensa rònt di dje. E muraya parti pafó tabata 100 meter haltu i 29 meter hanchu. (Esei ta sufisiente hanchu ku 8 outo por stashoná banda di otro. En kontraste, otro statnan tabatin murayanan ku tabata 1 pa 7 meter hanchu.) Tabatin shen porta den e murayanan rònt di e stat, trahá di bròns. Asta e kosein di porta tabata trahá di brons. Den e murayanan tabatin 250 toren di vigilansia. E torennan tabata 30 meter mas haltu ku e muraya. Ademas, rònt di e murayanan tabatin un kanal.

Apesar di tur e defensanan aki, Dios a mira e piká di Babilonia. Diferente profeta a profetisá kontra Babilonia. Isaias a profetisá na aña 783-704 B.C., bisando *“I Babilonia, e bunitesa di reinonan, e gloria di e orguyo di e kaldeonan, lo ta manera Sodoma i Gomora, tempu ku Dios a destruí nan. Di generashon pa generashon nunca mas e lo wòrdum habitá ni poblá; ni arabir lo no arma su tèt ayanan, ni wardadó di karné lo no pone su tou di karné drumi ayanan. Ma bestianan di desierto lo sosegá ayanan, i nan kasnan lo ta yen di palabrua; abestrus tambe lo biba ayanan, i kabritu di mondi lo bula rònt ayanan. I hiena lo yora den nan torennan fortifiká i chakál den nan palasionan luhoso. Tambe su tempu lo bin pronto i su dianan lo no wòrdum prolongá.”* *“I lo Mi hasié bira propiedat di porko di spiña, i hasié bira plasnan di awa, i lo Mi barié ku e basora di destrukshon,” e SEÑOR di ehérsitonan ta deklará.*” (13:19-22; 14:23). Profeta Jeremias (626-586 B.C.) a agregá, *“I nan lo no tuma ni un piedra pa skina, ni piedra pa fundeshi for di bo, ma lo bo keda desolá pa semper,” SEÑOR ta deklará. Su statnan a bira un opheto di horror, un tera seku i un desierto, un tera kaminda ningun hende no ta biba, i dor di kual ningun yu di hende no ta pasa”* (Jeremiah 51:26,43).

Kiko ta e pronostikashonnan prinsipal di e profesia aki? 1) Babilonia lo ta manera Sodoma i Gomora (Isaias 13:19). 2) Babilonia hamas lo ta habitá (Isaias 13:20; Jeremias 51:26). 3) Arabirnan lo no arma nan tent ei (Isaias 13:20). 4) Lo no tin kurá di karné ei (Isaias 13:20). 5) Bestianan di desierto lo poderá di e ruínanan (Isaias 13:21). 6) Piedranan lo no ta kitá pa konstrukshon di otro proyekto (Jeremias 51:26). 7) Poko hende lo bishitá e ruínanan antiguo (Jeremias 51:26). 8) Tapá pa awanan di muras (Isaias 14:23).

Kiko di kumplimentu di e profesianan aki? Ehersito di Persia, a rondoná e stat di Babilonia. Nan a konkluí ku nan no por kibra e murayanan ni e portanan. Ma Gobryas i Gadatas a traishoná Babilonia pa yuda e persikonan. Opservando ku riu Eufrates a kore bou di e murayanan imenso, ehersito di Persia a koba kanalnan pa desviá awa di riu Eufrates pa esaki bai den un otro direkshon.

Paden e murayanan di Babilonia, rei Belsasar i e poblashon tabata chèrchi di e pobersito ehersito enemigu di Persia pafó. El a sinti asina sigur ku e tabata parandiá na un fiesta anual pa nan diosnan (Daniel 5), sin realisá ku na e mésun momentu ei, e ehersito enemigu tabata drepta e

stat bou di muraya. Dia 13 di òktober 539 B.C., ehersito di Persia a konkistá Babilonia sin bringa! Algun siman despues, Siro, rei di Persia a drenta e stat i tabata proklamá rei di Babilonia

Poko poko e stat a kuminsá dekaí. E mandatarionan ku a sigui despues, tabata asina destraí ku nan guernan ku nan no tabatin tempu òf sèn pa invertí den e stat. Alejandro e Grandi a deseá pa restorá e gran tèmpe di Babilonia, ma esei lo tabata muchu kostoso. Ora Alejandro a muri, su komandantenan a bringa pa keda ku sierto parti di e impero pa nan mes. Porfin, e seleusidanan a haña kontròl di Babilonia. Nan a pensa pa restorá Babilonia i us'è komo nan kapital. Ma nan a disidí ku lo ta mas barata pa konstruí un otro stat komo kapital ku restorá Babilonia. P'esei nan a konstruí Seleusia 60 kilometer nort di Babilonia.

Tin konfushon kuantu aña mas e stat di Babilonia a kontinuá. Durante reinado di emperadó Augusto (27 B.C. – 14 A.D.), Strabo a bishitá Babilonia i a skirbi, “E gran stat a bira un desierto”. Otronan ta di opinion ku e stat a kontinuá te 100 A.D.

Segun Ensiklopedia Britanika, “Te di 19 siglo, konosementu di Babilonia i Asiria tabata basá riba Tèstament Bieu i algun eskritor griegu. No tabata te despues di deskubrimentu di monumentonan i dokumentonan antiguo na dos pais i espesialmente ora ekspertonan lingwistiko a logra saka afó nifikashon di e skirbimentu di e imperonan antiguo, ku historia i sivilisashon di Babilonia i Asiria a bira konosí.”

Laga nos pensa tokante e profesianan atrobe. Méskos ku Sodoma i Gomora, awendia Babilonia ta destruí—kumplimentu di profesia #1. Profesianan #2-5 a wòrdu kumplí palabra pa palabra. Austen R. Layard a skirbi den su buki *Discoveries Among the Ruins of Nineveh and Babylon* (Deskubrimentunan Entre e Ruínanan di Nínivé i Babilonia—1853): “...e sitio di Babilonia ta sunú i sumamente bashí. Palabrua ta spanta, bula for di e poko mondi i chakal grandi ta hui bou di tera.” “Tin hopi palabrua grandi akinan. Ku frekuensia kasi shen di nan ta bula huntu entre e poko matanan entre e ruínanan di Babilonia.” Floyd Hamilton a deklará: “Biaheronan ta raportá ku e stat ta kompletamente sin habitante, ni asta tin arabir ku ta muda tur ora (bedouino). Tin vários superstishon entre e arabirnan ku ta prevení nan di arma nan tent einan, maske tera ta produsí matanan bon pa tounan kome.” Peter Stoner a agregá: “No tin kurá pa karné na Babilonia.”

E di seis profesia ta mas difisil pa bisa sigur kon e profesia a keda kumplí dor ku no ta konosí presis na ken “nan” ta referí den Jeremias 51:26 (“*Nan lo no tuma ni un piedra pa skina, ni piedra pa fundeshi for di bo...*”) Si e teksto ta referí na Siro, rei di Persia, esei sigur ta harmonisá ku e profesia. Siro no a bai ku ni un blòki for di Babilonia. Peter Stoner a skirbi, “Klinkernan i material di hopi forma a wòrdu saká for di e ruínanan di e stat. Ma e piedranan, ku Babilonia a paga asina tantu pa importá, no a wòrdu kitá.”

Relashoná ku profesia shete, poko hende ta bishitá e stat antiguo, Peter Stoner a skirbi, “Maske kasi tur siudat antiguo ta riba rutanen prominente pa turistanan, esei no ta e kaso ku Babilonia. E ta haña poko bishitante.” I, manera a wòrdu pronostiká ku e di 8 profesia, te awendia, e sitio di Babilonia ta un desierto i tambe gran parti di e stat ta bou di e awanan di muras. Komo resultado, arkeólogonan no por studia e parti aki.

Segun Stoner su kalkulashon, tin solamente 1 chèn den 5.000.000.000 ku e profesianan tokante Babilonia por a wòrdu kumplí. Tempu ku Isaias i Jeremias a hasi e profesia tokante Babilonia, nan no por a imaginá ku esaki por a sosodé.

E defensanan no ta problema pa misilnan, bòmnan i armanan moderno. Ma pa síglonan i asta milenionan, e defensanan di Babilonia lo tabata inpenetrabel pa ehersitonan enemigu—asta durante promé guera mundial Babilonia lo tabata invensibel. Apesar di tur esei, tòg Skritura a profetisá e destrukshon di Babilonia. No tin otro manera pa splika kumplimentu di e profesia aki, sino e echu ku Beibel ta Palabra di Dios, pasobra Dios so sa futuro!

#### **D. PROFESIANAN TOKANTE KRISTU**

Kumplimentu di e profesianan ku nos a mira ta sumamente impreshonante. Ningun hende ku sano huisio lo asta imaginá hasi pronostikashonnan asina. Ma echu ta ku Spiritu Santu

no solamente a inspirá profetanán pa pronostiká kos ta inkreíbel. E tambe a sòru ku e profesianan aki a wòrdu kumplí, palabra pa palabra.

Ma ningun profesia ta mas impreshonante ku e profesianan tokante Kristu. Hopi eskritor di Skritura a hasi shenes di profesia tokante e Mesias ku lo bin. Algun di e profesianan a wòrdu kumplí kaba ku Su promé binida. Ma tin profesianan ku lo no wòrdu kumplí te Su di dos binida. Laga nos opservá 50 profesia mesiániko ku Jesus a kumpli.

	Profesia	Kumplimentu
1) Simia di muhé	Gen 3:15 – “ <i>I lo Mi pone enemistat entre abo i e muhé, i entre bo simia i su simia; e lo heridá bo kabes, i abo lo heridá Su hilchi di pia</i> ”	Gal 4:4 – “ <i>Ma ora ku e plenitut di e tempu a yega, Dios a manda Su Yu, nasí di un muhé, nasí bou di Lei...</i> ”
	Esaki ta e promé profesia tokante e Salbador—Mesias. E ta indiká un lucha entre Mesias i Satanas. Satanas lo heridá Su hilchi na krus, ma Mesias lo derotá Satanas na e krus.	
2) Nase di un birgen	Isa 7:14 – “ <i>Señor mes lo duna boso un señal: Mira, un birgen lo Sali na estado i lo haña un yu hòmber, i e lo dun’E e nòmber Emanuel.</i> ”	Mt 1:18-25 – “ <i>...promé ku nan a bai biba huntu, a sosodé ku Maria tabata na estado di Spiritu Santu. Awor tur esaki a sosodé <b>pa loke a wòrdu papiá dor di Señor pa medio di e profeta por a keda kumplí</b>, ora ku el a bisa: “Ata, e birgen lo sali na estado, i lo haña un Yu hòmber, i nan lo dun’E e nòmber Emanuel,” ku tradusí ta nifiká: “Dios ku nos.”</i> ” Lk 1:26-35
3) Desendiente di Abraham	Gen 22:18 – “ <i>I den bo desendientenan tur e nashonnan di tera lo ta bendishoná...</i> ” Gen 17:7	Mt 1:1 – “ <i>E buki di genealogia di Jesu-Cristo, yu hòmber di David, yu hòmber di Abraham.</i> ” Gal 3:16
4) Desendiente di Isaak	Gen 21:12 – “ <i>Ma Dios a bisa Abraham, ‘...dor di Isaak bo desendientenan lo wòrdu kontá.’</i> ”	Mt 1:2,16 – “ <i>Abraham a engendrá Isaak; i Isaak a engendrá Jakòb; i Jakòb a engendrá Juda i su ruman hòmbernan... for di kende Jesus a nase...</i> ” Lk 3:23-24
5) Desendiente di Jakòb	Num 24:17 – “ <i>...un stea lo sali for di Jakòb, i un sèpter lo lanta for di Israel...</i> ”	Mt 1:2,16 – “ <i>Abraham a engendrá Isaak; i Isaak a engendrá Jakòb; i Jakòb a engendrá Juda i su ruman hòmbernan... for di kende Jesus a nase...</i> ” Lk 1:33; 3:23-24
6) Tribu di Juda	Gen 49:10 – “ <i>E septer lo no kita for di Juda, ni e bara di gobernadó for di meimei di su pia, te ora Silo bin, i nashonnan lo obedes’E.</i> ”	Heb 7:14 – “ <i>Pasobra ta evidente ku nos Señor tabata desendiente di Juda, i enkuanto e tribu ei Moisés no a papia nada-nada tokante di saserdotenan.</i> ” Mt 1:2; Lk 3:23-33
7) Desendiente di Isai	Isa 11:1,10 – “ <i>Anto un Spreit lo sali for di e tronkon di Isai, i un Rama for di su raisnan lo karga fruta. ...den e dia ei ku e nashonnan lo akudí na e Rais di Isai...</i> ”	Mt 1:6,16 – “ <i>...Isai a engendrá rei David... for di kende Jesus a nase...</i> ” Lk 3:23-24
8) Desendiente di David	Sal 132:11 – “ <i>Señor a hura un bèrdat na David, for di kual E lo no hal’atras: ‘Un di bo desendientenan lo Mi pone riba bo trono.’</i> ” 2 Sam 7:12-16; Jer 23:5	Lk 18:38 – “ <i>...Jesus, Yu di David...</i> ” Mt 1:6,16 – “ <i>...Isai a engendrá rei David... for di kende Jesus a nase...</i> ” Mt 9:27; 15:22; 20:30-31; 21:9,15; 22:41-46; Lk 3:23-31
9) Nase na Bètlehèm	Mik 5:2 – “ <i>Ma abo, Bètlehèm Efrata, muchu chikitu pa ta entre e famianan di Juda, for di bo lo sali Uno pa Mi pa ta Gobernante na Israel. Su origen ta for di hopi tempu pasá, for di e dianan di etèrnidad.</i> ”	Mt 2:1-6 – “ <i>...unda e Cristo lo mester a nase. I nan a kontest’é: “Na Bètlehèm di Judea, pasobra <b>asina a wòrdu skirbí dor di e profeta: ‘I abo, Bètlehèm, tera di Juda...for di bo lo sali un Gobernante, Kende lo pastoríá Mi pueblo Israel.’</b>”</i> ” Lk 2:4-7

10) Tempu na Egipto	Ose 11:1 – “ <i>When Israel was a youth I loved him, and out of Egypt I called My son.</i> ”	Mt 2:13-15 – “ <i>I den anochi el a lanta i a kohe e Mucha I su mama, i a sali bai Egipto...<b>pa loke a wòrdu papia dor di Señor pa medio di e e profeta por a keda kumpí...</b></i> ”
11) Matansa di beibinan na Bètlehèm	Jer 31:15 – “ <i>Un bos ta wòrdu tendi na Rama, lamentashon i yoramentu amargo. Raquel ta yora su yunan, i no kier wòrdu konsolá pa su yunan, pasobra nan no t’ei mas.</i> ”	Mt 2:16-18 – “ <i>...Herodes... a laga mata tur e mucha hòmbènan ku tabatin na Bètlehèm i den henter e besindario ei, di edat di dos aña p’abou... <b>E ora ei a keda kumpli loke a wòrdu papiá dor di profeta Jeremias...</b></i> ”
12) Su karakter grasioso	Isa 42:1-4 – “ <i>Ata Mi Sirbidó ku Mi ta sostené, Mi Skohí, den Kende Mi alma tin delisia. Mi a pone Mi Spiritu riba djE; E lo trese hustisia pa e nashonnan. E lo no grita ni halsa Su bos, ni E lo no laga Su bos wòrdu tendí den kaya. Un richi gekrak E lo no kibra, i un mecha ku ta sende flou E lo no paga; E lo trese huisio segun bèrdat. E lo no faya ni keda deskurashá, te ora ku El a stablé hustisia riba tera; i e teranan na kosta lo spera riba Su lei.</i> ”	Mt 12:15-21 – “ <i>...<b>loke a wòrdu papiá dor di profeta Isaias por wòrdu kumpli,</b> bisando: “Ata Mi Sirbidó ku Mi a skohe, Mi Stimá, den Kende Mi alma tin goso; lo Mi pone Mi Spiritu riba djE, i E lo proklamá hustisia na e paganonan. E lo no pleita, ni halsa bos; i ningun hende lo no tende Su bos den e kayanan. Un richi gekrak E lo no kibra, i un mecha ku ta sende flou E lo no paga, te ora ku E hiba hustisia na viktoria. I den Su nòmber e paganonan lo spera.”</i> ”
13) Su zelo pa Dios	Sal 69:9 – “ <i>Pasobra zelo pa Bo kas a kaba ku mi, i e reprochenan di esnan ku ta reprocháBo a kai riba mi.</i> ”	Jn 2:15-17 – “ <i>I El a traha un zwip di kabuya i a saka nan tur for di tèmpel, huntu ku e karnénan i e bueynan; i El a basha e plaka di e kambiadónan abou i a bòlter nan mesanan; i na esnan ku tabata bende palomba El a bisa: “Kita e kosnan aki for di einan; stòp di hasi e kas di mi Tata un kas di negoshi.” <b>Su disipelnan a kòrda ku tabata pará skirbí: “E zelo pa Bo kas lo kaba ku Mi.”</b></i> ”
14) Ungí ku Spiritu Santu	Isa 61:1-2 – “ <i>‘E Spiritu di Señor DIOS ta riba mi, pasobra SEÑOR a ungimi pa hiba bon nobo na esnan aflagi; El a mandami pa kura hende di kurason kibrá, pa proklamá libertat na katibunan, i libertat na prezonan, pa proklamá e aña agradabel di SEÑOR...’</i> Isa 11:2	Lk 4:16-21 – “ <i>El a habri e buki i a haña e lugá kaminda tabata pará skirbí: ‘E Spiritu di SEÑOR ta riba Mi, pasobra El a ungiMi pa prediká evangelio na e pobènan; El a mandaMi pa proklamá libertat na e prezonan, i restorashon di bista na e siegunan, pa duna libertat na esnan ku ta wòrdu oprimi, pa proklamá e aña agradabel di SEÑOR.’ ...El a kuminsá bisa nan: “Awe e Skritura aki a keda <b>kumpli boso dilantí</b>”</i> ”
15) Anunsiadó	Isa 40:3 – “ <i>Bos di un ku ta sklama: “Prepará e kaminda pa SEÑOR den desierto; traha den desierto un kaminda lizu pa nos Dios.”</i> Mal 3:1	Mt 3:1-3 – “ <i>...Juan Boutista...<b>ta esun ku profeta Isaias a papia di djé,</b> bisando: “E bos di un ku ta sklama den desierto: ‘Prepará e kaminda di SEÑOR, hasi Su berehanan stret!’”</i> ”
16) Ministerio na Galilea	Isa 9:1-2 – “ <i>Ma lo no tin tiniebla mas pa esun ku tabata den angustia. Den tempunan pasá El a trata tera di Zabulon i tera di Nèftalí ku despresio, ma despues E lo hasié glorioso, na e kaminda di laman, na e otro banda di Jordan, Galilea di e paganonan. E pueblo ku ta kana den skuridat lo mira un gran lus; esnan ku ta biba den un tera skur, un lus lo lusa riba nan.</i> ”	Mt 4:12-16 – “ <i>...Jesus... a bolbe pa Galilea; i saliendo for di Nazarèt, El a bin biba na Kapernaum, ku ta keda kantu di laman, den e region di Zabulon i Nèftalí. <b>Esaki a sosodé pa keda kumpli loke a wòrdu papiá dor di profeta Isaias,</b> ‘Tera di Zabulon i tera di Nèftalí, na kaminda di laman, na e otro banda di Jordan, Galilea di e paganonan; e pueblo ku tabata sintá den skuridat a mira un gran lus, i esnan ku tabata sintá den e tera di sombra di morto, riba nan un lus a resplandesé.’”</i> ”
17) Su siñansa ku parabolanan	Sal 78:2 – “ <i>Lo mi habri mi boka i papia den parábola; lo mi papia di kosnan skondí di promé aya.</i> ”	Mt 13:34-35 – “ <i>Tur e kosnan aki Jesus a papia ku e multitutnan pa medio di pará-bola, i E no a papia nada ku nan sin uza parábola, <b>pa por a keda kumpli loke a wòrdu anunsiá dor di e profeta,</b> kende a bisa: “Lo Mi habri Mi boka den parábola; lo Mi konta</i> ”

		<i>kosnan ku a keda skondí desde e fundashon di mundu.”</i>
18) Su milagerman	Isa 53:4 – “ <i>Siguramente E mes a karga nos enfermedatnan, i El a karga nos tristesa...</i> ” Isa 35:5-6 – “ <i>E ora ei wowo di e siegunan lo mira, i orea di e sordonan lo tende. Anto e kohonan lo bula manera biná, i lenga di e mudo lo grita di alegria...</i> ”	Mt 8:16-17 – “ <i>I ora nochi a sera nan a trese serka djE hopi hende ku tabata poseí pa demoño; i ku un palabra El a saka e spiritunan afó i a kura tur ku tabata malu, pa por a keda kumplí loke a wòrdu papiá dor di profeta Isaías, kende a bisa: "E mes a tuma nos enfermedatnan riba djE i a karga nos malesanan".</i> ”
19) Rechasá pa Su mes hendenan	Sal 69:8 – “ <i>Mi a bira un stranhero pa mi ruman hòmbèrnan, i un deskonosí pa e yunan di mi mama.</i> ”	Jn 1:11 – “ <i>El a bin serka esnan ku tabata di djE, i esnan ku tabata di djE no a risibiE.</i> ” Jn 7:5
20) E lo drenta tèmpel	Mal 3:1 – “ <i>And the Lord, whom you seek will suddenly come to His temple; and the messenger of the covenant, in whom you delight, behold, He is coming’, says the LORD of hosts.</i> ”	Mt 21:12 – “ <i>I Jesus a bai den tèpel i a kore ku tur esnan ku tabata kumpra i bende den tèmpel saka nan afó, i a bòlter e mesanan di e kambiadónan di plaka, i e stulnan di esnan ku tabata bende palombe.</i> ”
21) Drenta Herusalèm riba buriku	Zak 9:9 – “ <i>Regosihá grandemente, O yu muhé di Sion! Grita ku húbilo, O yu muhé di Herusalèm! Ata bo Rei ta bin serka bo; E ta hustu i ta trese salbashon, umilde i sintá riba un buriku, riba un buriku yòn, yu di un buriku muhé.</i> ”	Mt 21:1-11 – “ <i>Awor esaki a sosodé pa por keda kumplí loke a wòrdu bisá dor di e profeta ku a bisa: ‘Bisa e yu muhé di Sion: “Ata bo Rei ta bin serka bo, mansu i sintá riba un buriku, un yu di buriku, yu di un bestia di karga.” I e disipelnan a bai i a hasi manera Jesus a ordená nan</i> ” Lk 19:35-37
22) Traishoná pa un amigo	Sal 41:9 – “ <i>Asta mi amigu íntimo, den ken mi a konfia, kende a kome mi pan, a lanta su hilchi kontra mi.</i> ” Sal 55:12-14	Mt 26:47-56 – Tokante Su traishon, Jesus a bisa, “ <i>.bo ta kere ku Mi no por pidi Mi Tata, i mesora E lo pone mas ku diesdos legion di angel na Mi disposishon? Kon anto e Skrituranan por wòrdu kumplí, ku ta bisa ku t’asina mester sosodé? ...tur esaki a tuma lugá pa e Skrituranan di e profetanán por keda kumplí.</i> ” Mt 10:4
23) Bendí pa 30 pida di plata	Zak 11:12 – “ <i>I mi a bisa nan: "Si boso ta haña ta bon, dunami mi suèlto; ma si no, laga numa!" Asina nan a pisa trinta siklo di plata komo mi suèlto.</i> ”	Mt 26:14-15 – “ <i>...un di e diesdosnan ku yama Judas Iskariot a bai serka e saserdotenan prinsipal, i a puntra: "Kiko boso kier dunami si mi entregu 'E na boso?" I nan a dun'é trinta pida plata. I for di e ora ei e tabata buska un bon oportunitat pa entregu 'E</i> ”
24) E plata tirá den tèmpel	Zak 11:13 – “ <i>Anto SEÑOR a bisami: "Tira esaki pa e alfarero, e preis magnífiko ei na kual nan a baloráMi." Asina mi a kohe e trinta siklo di plata i a tira nan pa e alfarero den e kas di SEÑOR.</i> ”	Mt 27:5 – “ <i>...ora Judas, esun ku a traishon 'E, a mira ku El a wòrdu kondená, su konsenshi a remord'é i el a debilbé e trinta pidanan di plata na e saserdotenan prinsipal i e ansianonan, bisando: "Mi a peka dor di traishoná sanger inosente." ...el a tira e pidanan di plata den e santuario i a sali bai</i> ”
25) E plata usá pa kumpra tereno		Mt 27:9-10 – “ <i>Anto a keda kumplí loke a wòrdu papiá dor di profeta Jeremias, bisando: 'I nan a kohe e trinta pidanan di plata, e preis di Esun, Kende Su preis a wòrdu balorá pa e yunan di Israel; i nan a duna esakinan pa e pida tereno di e alfarero, manera SEÑOR a ordenámi.</i> ”
	Segun e òrdu di e rabinan di e bukinan profétiko, Jeremias semper tabata listá promé. P’esei, ku frekuensia e bukinan profétiko tabata konosí komo “Jeremias” (méskos ku e “Skribimentunan” tabata konosí komo “Salmonan”).	
26) Bandoná pa Su disipelnan	Zak 13:7 – “ <i>...Dal e Wardadó mata pa e karnénan wòrdu plamá...</i> ”	Mt 26:56 – “ <i>E ora ei tur e disipelnan a bandon 'E i a hui bai.</i> ”
27) Odiá sin	Sal 69:4 – “ <i>Esnan ku ta odiami sin motibu</i>	Jn 15:25 – “ <i>Ma nan a hasi esaki, pa e palabra</i>



motibu	<i>ta mas ku e kabeinan riba mi kabes; esnan ku kier a destruimi ta poderoso; loke mi no a hòrta, mi mester debolbé tòg...</i>	<b>ku ta pará skirbí den nan Lei keda kumpli:</b> 'Sin motibu nan a odiaMi." Lk 23:22
28) Akusashona n falsu	Sal 35:11 – “ <i>Testigunan malisioso ta lanta; nan ta puntrami tokante di kosnan ku mi no sa.</i> ”	Mt 26:59-61 – “ <i>Awor e saserdotenan prinsipal i henter e Konsilio tabata purba haña testimonio falsu kontra Jesus, pa nan por a laga mat'E; ma nan no por a haña nada, maske ku hopi testigu falsu a presentá.</i> ”
29) Ketu dilanti Su akusadónan	Isa 53:7 – “ <i>E tabata oprimi i E tabata afligí, tòg E no a habri Su boka; manera un lamchi ku ta wòrdu hibá pa mata, i manera un karné ta ketu dilanti di su peladónan, asina E no a habri Su boka.</i> ”	Mt 27:12-14 – “ <i>I ora ku e saserdotenan prinsipal i e ansianonan tabata akus'E, E no tabata kontestá nada. E ora ei Pilato a puntr'E: "Bo no ta tende kuantu kos nan ta testifiká kontra Bo?" I E no tabata kontest'é riba ningun akusashon, asina ku e gobernadó a keda masha strañá.</i> ”
30) Rechasá pa paganonan	Sal 2:1-2 – “ <i>Pakiko e nashonnan ta reboltiá asina, i e pueblonan ta plania un kos bano? E reinan di mundu ta tuma nan posishon, i e gobernantenan ta konsultá huntu kontra SEÑOR i kontra Su Ungi.</i> ” Sal 22:16	Ech 4:25-27 – “ <i>O Señor, ta Abo a traha shelu i tera i laman i tur loke tin den nan. Kende, pa medio di Spiritu Santu, pa medio di boka di nos tata David, Bo sirbidó, a bisa: 'Pakiko e nashonnan ta furioso asina, i e pueblonan ta plania kosnan bano? E reinan di mundu a tuma nan posishon, i e gobernantenan a bin huntu kontra SEÑOR i kontra Su Cristo.' Pasobra di bèrdad den e stat aki a bin huntu kontra Bo Yu santu Jesus, Kende Bo a ungi, tantu Herodes komo Ponsio Pilato, huntu ku e paganonan i e pueblonan di Israel.</i> ”
31) Nan lo dal E i skupi riba djE	Isa 50:6 – “ <i>Mi a entregá Mi lomba na esnan ku ta gòlpiaMi, i Mi band'i kara na esnan ku ta ranka Mi barba kit'afó; Mi no a skonde Mi kara pa umiyashon i skupimentu.</i> ”	Mt 26:67 – “ <i>E ora ei nan a skupi den Su kara i a dal E ku moketa; i otronan a bòft'E...</i> ”
32) Ridikulisá	Sal 22:6-8 – “ <i>Ma ami ta un bichi, i no un hende, un reproche pa hende, i despresiá pa e pueblo. Tur esnan ku mirami ta hasi bofon di mi; nan ta trèk boka, nan ta sakudí kabes, bisando: "El a konfia den SEÑOR; lagu'E libr'é; lagu'E reskat'é, pasobra E tin delisia den djé.</i> ”	Mt 27:27-31 – “ <i>Anto e sòldánan di gobernadó a hiba Jesus den e Pretorio, i a reuní henter e batayon romano rònt di djE. I nan a ranka Su paña for di Su kurpa, i a bistiE un mantel koló skarlata. I despues di a flègt un korona di sumpiña, nan a pone esei riba Su kabes, i un richi den Su man drechi; i nan a hinka rudia Su dilanti i a hasi bofon di djE, bisando: "Saludo, Rei di e hudiunan!" I nan a skupi riba djE i a kohe e richi i a kuminsá dal E riba Su kabes. I despues ku nan a hasi bofon di djE...</i> ”
33) Heridá	Isa 53:5 – “ <i>Ma El a wòrdu traspasá pa nos transgreshonnan, El a wòrdu gòlpiá pa nos inikidatnan; e kastigu ku a trese pas pa nos tabata riba djE, i pa medio di Su heridanan nos ta kurá.</i> ”	Mt 27:26 – “ <i>...Jesus el a laga suta i a enteguE pa wòrdu krusifiká.</i> ”
34) Mannan, pianan i kustia hinká	Sal 22:16 – “ <i>Pasobra kachónan a rondonámi; un trupa di hasidónan di maldat ta tur rònt di mi; nan a traspasá mi mannan i mi pianan.</i> ” Zak 12:10 – “ <i>...nan lo mira na Mi, Esun ku nan a traspasá...</i> ”	Jn 19:34-37 – “ <i>...un di e sòldánan a traspasá Su kustia ku un lansu i mesora a sali sanger i awa. I esun ku a mira a duna testimonio, i su testimonio ta bèrdadero; i e sa ku e ta papia e bèrdad, pa boso tambe por kere. Pasobra e kosnan aki a sosodé pa e Skritura por wòrdu kumpli: "Ni ún wesu di djE lo no wòrdu kibrá." I tambe un otro Skritura ta bisa: "Nan lo mira riba Esun ku nan a traspasá."</i> ”
35) Orashon pa Su matadónan	Isa 53:12 – “ <i>...E mes a karga e piká di hopi hende, i a intersedé pa e transgresornan.</i> ”	Lk 23:34 – “
36) Morto huntu ku malbadonan	Isa 53:12 – “ <i>...El a drama Su bida te na morto, i a wòrdu kontá huntu ku e</i>	Mt 27:38 – “ <i>E mesun tempu ei dos ladron a wòrdu krusifiká huntu kunE, un na man drechi</i>

	<i>transgresornan...</i>	<i>i un na man robes."</i>
37) Hende ta sakudí kabes	Sal 109:25 – “ <i>Tambe mi a bira un reproche pa nan; ora nan mirami, nan ta sakudí kabes.</i> ”	Mt 27:39 – “ <i>I esnan ku tabata pasa, tabata blasfem 'E i sakudí kabes, bisando: 'Abo ku ta bai destruí e tèmpele i lant'è bèk den tres dia, salba Bo mes! Si Bo ta e Yu di Dios, baha for di e krus ei.</i> ”
38) Hende ta wak E	Sal 22:17 – “ <i>...nan ta wak, i ta keda wak mi.</i> ”	Lk 23:35 – “ <i>I e pueblo tabata pará einan ta wak.</i> ”
39) Amigunan ta keda leu	Sal 38:11 – “ <i>Mi stimánan i mi amigunan ta hala leu for di mi plaga; i mi famianan ta keda para leu.</i> ”	Lk 23:49 – “ <i>I tur Su konosinan i e muhénan, ku tabata siguiE for di Galilea, tabata para na un distansia ta wak e kosnan aki.</i> ”
40) Tira lòt pa Su pañanan	Sal 22:18 – “ <i>Nan ta parti mi pañanan entre nan, i nan ta tira lòt riba mi bistí.</i> ”	Jn 19:23-24 – “ <i>E sòldánan anto, ora nan a krusifiká Jesus, a kohe Su pañanan i a parti nan na kuater, pa kada sòldá ún parti, i e túnika tambe. Awor e túnika tabata sin nat, gewef na ún solo pida. Nan a bisa otro anto: 'Laga nos no sker esaki, ma tira lòt riba djé, pa disidí di ken e lo ta.' Pa e Skritura por a keda kumplí: 'Nan a parti Mi pañanan entre nan, i nan a tira lòt riba Mi paña.'</i> ”
41) Sed	Sal 69:21 – “ <i>Tambe nan a dunami hal pa kuminda, i pa mi set nan a dunami binager.</i> ”	Jn 19:28 – “ <i>Despues di esaki, Jesus, sabiendo ku tur kos a keda kumplí kaba, pa e Skritura por wòrdu kumplí, a bisa: 'Mi tin set.'</i> ”
42) Hal i binager ofresé n'E	Sal 69:21 – “ <i>Tambe nan a dunami hal pa kuminda, i pa mi set nan a dunami binager.</i> ”	Mt 27:34 – “ <i>...nan a dun'E biña mesklá ku hal pa bebe, ma ora ku El a purb'è, E no kier a beb'è.</i> ”
43) Su gritu: “Mi Dios, Mi Dios”	Sal 22:1 – “ <i>Mi Dios, mi Dios, pakiko Bo a bandonáMi? Pakiko Bo ta asina leu di yudami, asina leu di e palabranan di mi sklamashon?</i> ”	Mt 27:46 – “ <i>I banda di tres or di atardi Jesus a sklama na bos haltu, bisando: 'Eli, Eli, Lama Sabaktani?' ku ta nifiká: 'Mi Dios, Mi Dios, pakiko Bo a bandonáMi?'</i> ”
44) Entregá Su mes na Dios	Sal 31:5 – “ <i>Den Bo man mi ta enkomendá mi spiritu; Bo a redimími, O SEÑOR, Dios di fieldat.</i> ”	Lk 23:46 – “ <i>I Jesus, sklamando na bos haltu, a bisa: "Tata, den Bo mannan Mi ta entregá Mi spiritu." I ora ku El a kaba di bisa esaki, El a hala Su último rosea.</i> ”
45) Kurason kibrá	Sal 22:14 – “ <i>Mi ta wòrdu bashá afó manera awa, i tur mi wesunan a sali for di lugá; mi kurason ta manera was; el a dirti den mi paden.</i> ”	Jn 19:34 – “ <i>...un di e sòldánan a traspasá Su kustia ku un lansá i mesora a sali sanger i awa.</i> ”
46) Ningun wesu kibrá	Sal 22:17 – “ <i>Mi por kontá tur mi wesunan...</i> ” Sal 34:20 – “ <i>E ta kuida tur su wesunan; ningun di nan no ta wòrdu kibrá.</i> ”	Jn 19:33-36 – “ <i>ora nan a yega serka Jesus i a mira ku El a muri kaba, nan no a kibra Su pianan...e kosnan aki a sosodé pa e Skritura por wòrdu kumplí: "Ni ún wesu di djE lo no wòrdu kibrá."</i> ”
47) Derá ku hende riku	Isa 53:9 – “ <i>Nan a disponé ku Su graf lo ta huntú ku e malbadonan, i E tabata huntú ku e rikunan den Su morto...</i> ”	Mt 27:57-60 – “ <i>...a bin un hònber riku for di Arimatea ku yama Jose, kende tambe a bira un disipel di Jesus. ...Jose a tuma e kurpa i a lor'è den un pida tela di lino limpi, i a pon'è den su tumba nobo...</i> ”
48) Resurekshon	Sal 16:10 – “ <i>Pasobra lo Bo no entregá mi alma na Seol, tampoko lo Bo no pèrmití Bo Santu mira korupshon.</i> ”	Ech 2:31 – “ <i>David...a mira padilanti i a papia di e resurekshon di e Cristo, ku E no a wòrdu lagá den Hades, ni Su karni no a mira korupshon.</i> ”
49) Asenshon	Sal 68:18 – “ <i>Bo a subi bai den haltura, Bo a hiba koutiverio komo katibu...</i> ”	Ech 1:9 – “ <i>I ora ku El a kaba di bisa e kosnan aki, El a wòrdu tumá na shelu, mientras ku nan tabata para mira, i un nubia a kit'E for di nan bista.</i> ”
50) Sintá na man drechi di e Tata	Sal 110:1 – “ <i>SEÑOR ta bisa mi Señor: "Sinta na Mi man drechi, te ora Mi hasi Bo enemigunan un banki pa Bo pianan."</i> ”	Ech 2:33-36 – “ <i>Pesei, siendo halsá na man drechi di Dios i despues di a risibí for di e Tata e promesa di Spiritu Santu, El a drama esaki, lokual boso ta mira i tende. Pasobra no ta David a subi na shelu, ma e mes ta bisa:</i>

		<p>'SEÑOR a bisa mi SEÑOR: "Sinta na Mi man drechi, te ora Mi hasi Bo enemigunan un banki pa Bo pianan.'" 'Asina, laga henter kas di Israel sa sigur ku Dios a hasiE tantu Señor komo Cristo—e Jesus aki, Kende boso a krusifiká.'" Rom 8:34; Heb 1:3</p>
--	--	---

Peter Stoner a kalkulá e probabilidadat ku 9 di e profesianan mesiániko lo wòrdu kumplí dor di ún persona. El a selektá e siguiente profesianan: 9, 15, 21, 22, 23, 24, 25, 33 i 34 i a konkluí ku Hesus tabatin 1 chèns den 100.000.000.000.000.000!

Pa muestra kon impusíbel ta pa ún solo persona kumpli ku tur 9 profesia, el a ilustrá esaki di e siguiente manera. Segun Stoner, 100.000.000.000.000.000 florin (òf dies plaka merikano) lo tapa henter e pais di Spaña ku florin 60 sentimeter hundu. Suponé ku bo ta marka ún di e florinnan i ta skondé entre tur e 100.000.000.000.000.000 florinnan. Kiko ta e probabilidadat ku un hende ku wowo tapá por haña e ún florin ku bo a marka?

I esei no ta nada ora bo ta pensa di tur e profesianan ku Hesus a kumpli. Stoner a indiká ku e probabilidadat pa Hesus por a kumpli ku 48 profesia 100% lo ta 1 ku 158 sero (0) su tras!

Kòrda ku e profetanan no tabatin parti den kumplimentu di nan profesianan. Pa pensa ku ta probabel ku e profesianan aki por ser kumplí pa kasualidat ta un pensamentu apsurdo! Solamente un mente divino por profetisá e kosnan aki i kumpli ku nan. Solamente un Ser divino por superintendé historia di tal forma ku tur e profesianan aki lo wòrdu kumpli literalmente! Profesia kumplí ta un demonstrashon klave ku Skirtura ta nada ménos ku un Buki sobrenatural, ku Beibel ta nada ménos ku Palabra di Dios!

## Litertura Konsultá

Durante e añanan, mi a kompartí e informashon aki vários biaha. Lástimamente, mi no a tene rekòrt di tur e bukinan i otro literatura ku mi a usa pa kompilá e informashon. Mi sa sigur di dos fuente pa e informashon:

- Anderson, James. Notulonon ku mi a tuma den su klas di Apologétika na Calvary Bible College, Kansas City, Missouri, 1979.
- McDowell, Josh. *Evidence That Demands a Verdict* (Campus Crusade for Christ International), 1977.